海土西經

民國二十二年印光大師校印流通本



南無本師釋迦牟尼佛

說明

根據蘇州弘化社民國二十二年,印光大師校印流通的《淨土 五經》原影印本校對,句讀一一依照原書。原民國版《淨土五經》 中無讀誦儀軌,為受持方便故添之。

本電子書是免費結緣品, 特此說明。

仁慧草堂 二〇二〇年十月



掃碼關注仁慧草堂微信公眾號

一切佛經.及闡揚佛法諸書.無不令人趨吉避凶.改過遷善.明三世之因果.識本具之佛性.出生死之苦海.生極樂之蓮邦。讀者必須生感恩心.作難遭想.淨手潔案.主敬存誠.如面佛天.如臨師保.則無邊利益.自可親得。若肆無忌憚.任意褻瀆.及固執管見.妄生毀謗.則罪過彌天.苦報無盡矣。奉勸世人.各垂明鑑。

釋印光謹白

目錄

淨土五經重刊序	- 1 -
起誦儀	- 4 -
蓮池讃	- 4 -
開經偈	- 4 -
佛說阿彌陀經	- 5 -
拔一切業障根本得生淨土陀羅尼	10 -
附錄修行淨土法門後序	11 -
御製無量壽佛讚	12 -
佛說觀無量壽佛經	14 -
佛說無量壽經卷上	34 -
佛說無量壽經卷下	59 -
大佛頂首楞嚴經大勢至菩薩念佛圓通章	85 -
大方廣佛華嚴經普賢菩薩行願品	86 -
大方廣佛華嚴經淨行品1	02 -
淨土五經後附華嚴經淨行品緣起序1	11 -
大佛頂首楞嚴經四種決定清淨明誨	13 -
結誦儀 1	19 -
拔一切業障根本得生淨土陀羅尼1	19 -
讃佛偈1	20 -
西方發願文1	21 -
發願文1	23 -
慈雲懺主淨土文1	24 -
迴向偈1	25 -
迴向偈1	25 -
三皈依1	25 -
印送淨土五經跋	26 -

淨土五經重刊序

淨土法門,其大無外。三根普被,利鈍全收。 九界眾生, 捨此則上無以圓成佛道。十方諸佛, 離 此則下無以普度羣萌。一切法門. 無不從此法界 一切行門. 無不還歸此法界。若論大機所 見. 肇始實在華嚴。以善財徧參知識. 末後於普 賢座下. 蒙其威神加被. 所證者與普賢等. 與諸 佛等. 是爲等覺菩薩。普賢乃以十大願王. 勸進 善財. 及與華藏海衆四十一位法身大士. 回向往 生西方極樂世界,以期圓滿佛果,而爲華嚴一經 歸宗結頂之法。然則華嚴明一生成佛之法. 而歸 宗於求生淨土。是知淨土一法. 乃十方三世一切 諸佛,上成佛道,下化眾生,成始成終之無上大 法也。此殆大機所見,二乘尚不見聞,况具縛凡 夫乎。迨至方等會上. 特爲專說淨土三經. 俾一 切若凡若聖. 同事修持. 以期現生出此五濁. 登 彼九蓮也。佛在摩竭提國. 靈鷲山中. 說阿彌陀 佛. 最初因地. 棄國出家. 發四十八願。又復久 經長劫. 依願修行。迨至福慧圓滿. 得成佛道。 所感之世界莊嚴.妙莫能名。十方諸佛咸讚歎.十

方菩薩,與回小向大之二乘,具足惑業之凡夫,咸 得往生. 等蒙攝受。是爲無量壽經。於摩竭提國 王宮中. 說淨業三福. 十六妙觀。俾一切衆生. 悉 知是心作佛,是心是佛,諸佛正徧知海,從心想 生。則是心作衆生. 是心是衆生. 衆生煩惱業 從心想生之義. 便已彰明校著。果能深明此 誰肯枉受輪迴。末明九品生因. 以期各修上 品。是爲觀無量壽佛經。在舍衞國. 給孤園中. 說 淨土依正妙果令生信. 勸諸聞者. 應求往生以發 願. 復令行者. 執持名號以立行。信願行三. 爲 淨土法門之綱宗。具此三法. 或畢生執持. 已得 一心。或臨終方聞.止稱十念。均得蒙佛接引.往 生西方。是爲阿彌陀經。此三. 乃專談淨土之經。 而阿彌陀經. 攝機尤普。以故禪教律各宗. 咸皆 奉爲日課焉。諸大乘經.帶說淨土者.多難勝數。 而楞嚴經大勢至念佛圓通章.實爲念佛最妙開示。 衆生果能都攝六根. 淨念相繼以念. 豈有不現前 當來必定見佛, 近證圓通, 遠成佛道乎哉。故將 此章. 列於三經之後. 而以普賢行願品殿之. 以 成淨土法門之一大緣起。令諸閱者.知此一法.大 暢佛懷. 校彼仗自力斷惑證眞以了生死者. 其難 易奚啻天淵懸殊。以故九界同歸.十方共讚.千

經俱闡.萬論均宣也。金陵淨土四經板.已經模糊。修淨業者.苦無最清爽之讀本。因爲鑄板.以勢至念佛圓通章.附於三經之後.稱爲淨土五經。若論法門緣起.宜以無量壽經爲首。今爲便於讀誦.故以阿彌陀經爲首。閱者諒之。

民國二十二年歲次癸酉夏曆元旦常慚愧僧 釋印光謹撰

● 起舗儀

誦經警文

1. 未誦前. 漱口澡手。當淨三業. 若三業無虧. 則百福俱集。 三業者. 身口意也。端身正坐. 如對聖容. 則身業淨也。口無雜 言. 斷諸嬉笑. 則口業淨也。意不散亂. 屏息萬緣. 則意業淨也。

2. 未誦前. 已誦後. 俱要對聖像前合掌三禮。如無佛像. 對經. 對空禮拜亦可。

蓮池讚

(一遍)

蓮池海會. 彌陀如來. 觀音勢至坐蓮臺. 接引上金階. 大誓弘開. 普願離塵埃。

南無蓮池會菩薩摩訶薩合掌三稱

南無蓮池海會佛菩薩合掌三稱

南無本師釋迦牟尼佛合掌三稱

開經偈

(一遍)

無上甚深微妙法 百千萬劫難遭遇 我今見聞得受持 願解如來眞實義

佛說阿彌陀經

姚秦三藏法師鳩摩羅什譯

如是我聞.一時.佛在舍衞國.祇樹給孤獨 與大比丘僧. 千二百五十人俱。皆是大阿羅 漢. 衆所知識。長老舍利弗. 摩訶目犍連. 摩訶 迦葉. 摩訶迦旃延. 摩訶俱絺羅. 離婆多. 周利 槃陀伽. 難陀. 阿難陀. 羅睺羅. 憍梵波提. 賓 頭盧頗羅墮. 迦留陀夷. 摩訶劫賓那. 薄拘羅. 阿 篆樓馱, 如是等諸大弟子。幷諸菩薩摩訶薩, 文 殊師利法王子. 阿逸多菩薩. 乾陀訶提菩薩. 常 精進菩薩.與如是等諸大菩薩。及釋提桓因等.無 量諸天大衆俱。爾時佛告長老舍利弗. 從是西 方. 過十萬億佛土. 有世界名曰極樂。其土有 佛. 號阿彌陀. 今現在說法。舍利弗. 彼土何故 名爲極樂。其國衆生. 無有衆苦. 但受諸樂. 故 名極樂。又舍利弗,極樂國土,七重欄楯,七重 羅網. 七重行樹. 皆是四寶周市圍繞. 是故彼國 名爲極樂。又舍利弗. 極樂國土. 有七寶池. 八 功德水, 充滿其中。池底, 純以金沙布地。四邊 階道. 金. 銀. 瑠璃. 玻瓈. 合成。上有樓閣. 亦

以金、銀、瑠璃、玻瓈、硨磲、赤珠、碼碯、而 嚴飾之。池中蓮華. 大如車輪. 青色青光. 黃色 黃光.赤色赤光.白色白光.微妙香潔。舍利弗.極 樂國土,成就如是功德莊嚴。又舍利弗,彼佛國 土. 常作天樂. 黃金爲地。晝夜六時. 雨天曼陀 羅華。其土衆生. 常以清旦. 各以衣裓. 盛衆妙 華. 供養他方十萬億佛。卽以食時. 還到本國. 飯 食經行。舍利弗.極樂國土.成就如是功德莊嚴。 復次舍利弗. 彼國常有種種奇妙雜色之鳥. 白 鶴. 孔雀. 鸚鵡. 舍利. 迦陵頻伽. 共命之鳥。 是諸衆鳥.晝夜六時.出和雅音。其音演暢五 根. 五力. 七菩提分. 八聖道分. 如是等法。其 土衆生. 聞是音已. 皆悉念佛念法念僧。舍利 弗. 汝勿謂此鳥. 實是罪報所生。所以者何. 彼 佛國土. 無三惡道。舍利弗. 其佛國土. 尚無惡 道之名. 何况有實。是諸衆鳥. 皆是阿彌陀佛. 欲 令法音宣流.變化所作。舍利弗.彼佛國土.微 風吹動諸寶行樹.及寶羅網.出微妙音。譬如百 千種樂. 同時俱作。聞是音者. 自然皆生念佛念 法念僧之心。舍利弗. 其佛國土. 成就如是功德 莊嚴。舍利弗.於汝意云何.彼佛何故號阿彌陀。 舍利弗. 彼佛光明無量. 照十方國. 無所障礙. 是

故號爲阿彌陀。又舍利弗,彼佛壽命,及其人 民. 無量無邊阿僧祇劫. 故名阿彌陀。舍利弗. 阿 彌陀佛,成佛已來,於今十劫。又舍利弗,彼佛 有無量無邊聲聞弟子. 皆阿羅漢. 非是算數之所 能知。諸菩薩衆.亦復如是。舍利弗.彼佛國土.成 就如是功德莊嚴。又舍利弗. 極樂國土. 衆生生 者. 皆是阿鞞跋致。其中多有一生補處. 其數甚 多. 非是算數所能知之. 但可以無量無邊阿僧祇 說。舍利弗. 衆生聞者. 應當發願. 願生彼國。 所以者何. 得與如是諸上善人. 俱會一處。舍利 弗,不可以少善根福德因緣,得生彼國。舍利 弗. 若有善男子. 善女人. 聞說阿彌陀佛. 執持 名號. 若一日. 若二日. 若三日. 若四日. 若五 日. 若六日. 若七日. 一心不亂。其人臨命終時. 阿 彌陀佛. 與諸聖衆. 現在其前。是人終時. 心不 顚倒. 卽得往生阿彌陀佛極樂國土。舍利弗. 我 見是利. 故說此言。若有衆生. 聞是說者. 應當 發願,生彼國土。舍利弗,如我今者,讚歎阿彌 陀佛不可思議功德之利。東方亦有阿閦鞞佛. 須 彌相佛. 大須彌佛. 須彌光佛. 妙音佛. 如是等 恆河沙數諸佛。各於其國. 出廣長舌相. 徧覆三 千大千世界. 說誠實言。汝等衆生. 當信是稱讚

不可思議功德一切諸佛所護念經。舍利弗, 南方 世界, 有日月燈佛, 名聞光佛, 大燄肩佛, 須彌 無量精進佛. 如是等恆河沙數諸佛。各於 燈佛. 其國. 出廣長舌相. 徧覆三千大千世界. 說誠實 言。汝等衆生. 當信是稱讚不可思議功德一切諸 佛所護念經。舍利弗. 西方世界. 有無量壽佛. 無 量相佛. 無量幢佛. 大光佛. 大明佛. 寶相佛. 淨 光佛. 如是等恆河沙數諸佛。各於其國. 出廣長 舌相. 徧覆三千大千世界. 說誠實言。汝等衆 生. 當信是稱讚不可思議功德一切諸佛所護念經。 舍利弗, 北方世界, 有燄肩佛, 最勝音佛, 難沮 佛. 日生佛. 網明佛. 如是等恆河沙數諸佛。各 於其國. 出廣長舌相. 徧覆三千大千世界. 說誠 實言。汝等衆生. 當信是稱讚不可思議功德一切 諸佛所護念經。舍利弗.下方世界.有師子佛.名 聞佛. 名光佛. 達摩佛. 法幢佛. 持法佛. 如是 等恆河沙數諸佛。各於其國. 出廣長舌相. 徧覆 三千大千世界. 說誠實言。汝等衆生. 當信是稱 讚不可思議功德一切諸佛所護念經。舍利弗. 上 方世界, 有梵音佛, 宿王佛, 香上佛, 香光佛, 大 燄肩佛. 雜色寶華嚴身佛. 娑羅樹王佛. 寶華德 佛. 見一切義佛. 如須彌山佛. 如是等恆河沙數

諸佛。各於其國. 出廣長舌相. 徧覆三千大千世 界. 說誠實言。汝等衆生. 當信是稱讚不可思議 功德一切諸佛所護念經。舍利弗.於汝意云何.何 故名爲一切諸佛所護念經。舍利弗, 若有善男 子. 善女人. 聞是經受持者. 及聞諸佛名者。是 諸善男子. 善女人. 皆爲一切諸佛之所護念. 皆 得不退轉於阿耨多羅三藐三菩提。是故舍利 弗. 汝等皆當信受我語. 及諸佛所說。舍利弗. 若 有人. 已發願. 今發願. 當發願. 欲生阿彌陀佛 國者。是諸人等. 皆得不退轉於阿耨多羅三藐三 菩提。於彼國土. 若已生. 若今生. 若當生。是 故舍利弗. 諸善男子. 善女人. 若有信者. 應當 發願. 生彼國土。舍利弗. 如我今者. 稱讚諸佛 不可思議功德。彼諸佛等. 亦稱讚我不可思議功 德.而作是言.釋迦牟尼佛.能爲甚難希有之事。 能於娑婆國土.五濁惡世.劫濁.見濁.煩惱濁.衆 生濁. 命濁中. 得阿耨多羅三藐三菩提。爲諸衆 生, 說是一切世間難信之法。舍利弗, 當知我於 五濁惡世. 行此難事. 得阿耨多羅三藐三菩提。 爲一切世間說此難信之法. 是爲甚難。佛說此經 已. 舍利弗. 及諸比丘. 一切世間天人阿修羅 聞佛所說, 歡喜信受, 作禮而去。 等.

拔一切業障根本得生淨土陀羅尼

南無阿彌多婆夜。哆他伽跢夜。哆地夜他。阿彌唎。都婆毗。阿彌唎哆。悉耽婆毗。阿彌唎哆。悉耽婆毗。阿彌唎哆。毗迦蘭哆。伽彌膩。伽伽那。枳多迦隸。娑婆訶。

音釋:

附錄 修行淨土法門後序

娑婆,苦境也,欲脫衆苦,必修西方。西方,樂 國也. 欲生極樂. 必信佛言。譬如有人. 行於曠 野. 暮夜昏黑. 羣賊在後. 執持利器. 競來逼逐。 四顧彷徨. 逃避無所。呼天叫地. 誰來救卹。忽 遇老父,而告之言,此去不遠,有長者居,福德 威勢. 盜賊不侵。樓閣眞實. 快樂自在。煙霧所 障. 汝不能睹。汝但決往. 吾不汝誑。其人聞語. 歡 喜踴躍. 策步高驤. 不復迴顧. 注目一心. 更無 他想。俄頃之間.至長者所。羣賊苦惱. 杳絕蹤 迹。種種快樂.無異所聞。彌陀攝受衆生.長者 居也,安可不往。釋迦指導羣迷,老父言也,安 可不信。世之人,於西方之說,懵不能知,比比 皆是。知矣而不信. 信矣而不修. 修不能力者. 十 亦常八九焉。我今重覆設此譬喻,其不知者,可 以解會。而不信不修不力者,亦可加勉矣。夫修 西方而決願往生者, 豈有他哉, 善盡其力, 如遇 老父於避賊之時而已矣。

御製無量壽佛讚

西方極樂世界尊 能滅無始億劫業 若人能以微妙心 廣與衆生分別說 佛身色相顯光明 其高無比由旬數 眉間白毫五須彌 光明演出諸毛孔 一界中有河沙佛 ——相中復如是 以觀佛身見佛心 從相入得無生忍 佛身無量廣無邊 有憶想者得成就 衆生三種具三心 即得如來手接引 其身踊躍金剛臺 行大乘解第一義 阿彌陀佛大慈悲

無量壽佛世希有 今彼苦惱悉消除 常以極樂爲觀想 舉目卽見阿彌陀 閻浮檀金無與等 六十萬億那由他 紺眼泓澄四大海 一孔偏含諸大千 佛有八萬四千相 作是觀者隨現前 衆生憶想見化佛 以三昧受無邊慈 化導以彼宿願力 神通如意滿虛空 精進勇猛無退轉 七寶宮殿大光明 隨從佛後彈指頃 卽生七寶蓮池中 十力威德難讚說 稱名一聲超光子,不知無斷潛人一聲起一次,一點一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點,不可以一點

佛說觀無量壽佛經

劉宋西域三藏法師畫良耶舍譯

如是我聞.一時.佛在王舍城.耆闍崛山中。 與大比丘衆.千二百五十人俱。菩薩三萬二千.文 殊師利法王子而爲上首。

爾時王舍大城. 有一太子. 名阿闍世。隨順 調達惡友之教. 收執父王頻婆娑羅. 幽閉置於七 重室內. 制諸羣臣. 一不得往。國太夫人. 名韋 提希。恭敬大王、澡浴清淨、以酥蜜和麨、用塗 其身。諸瓔珞中. 盛蒲萄漿. 密以上王。爾時大 王.食麨飲漿.求水漱口。漱口畢已.合掌恭敬.向 耆闍崛山. 遙禮世尊. 而作是言。大目犍連. 是 吾親友. 願興慈悲. 授我八戒。時目犍連. 如鷹 隼飛.疾至王所。日日如是.授王八戒。世尊亦 遣尊者富樓那. 爲王說法。如是時間. 經三七 日.王食麨蜜.得聞法故.顏色和悅。時阿闍世.問 守門者. 父王今者. 猶存在耶。時守門人白言. 大 王. 國太夫人. 身塗麨蜜. 瓔珞盛漿. 持用上王。 沙門目連.及富樓那.從空而來.爲王說法.不 可禁制。時阿闍世、聞此語已、怒其母曰、我母

是賊.與賊爲伴。沙門惡人.幻惑呪術.令此惡 王. 多日不死。卽執利劍. 欲害其母。時有一臣. 名 曰月光. 聰明多智. 及與耆婆. 爲王作禮。白言. 大 王, 臣聞毗陀論經說, 劫初以來, 有諸惡王, 貪 國位故. 殺害其父. 一萬八千. 未曾聞有無道害 母。王今爲此殺逆之事. 汙刹利種. 臣不忍聞。 是旃陀羅. 我等不宜復住於此。時二大臣. 說此 語竟. 以手按劍. 卻行而退。時阿闍世. 驚怖惶 懼. 告耆婆言. 汝不爲我耶。耆婆白言. 大王. 愼 莫害母。王聞此語. 懺悔求救. 卽便捨劍. 止不 害母。勅語內官. 閉置深宮. 不今復出。時韋提 希.被幽閉已.愁憂憔悴。遙向耆闍崛山.爲佛 作禮. 而作是言。如來世尊. 在昔之時. 恆遣阿 難.來慰問我。我今愁憂.世尊威重.無由得見。 願遣目連. 尊者阿難. 與我相見。作是語已. 悲 泣雨淚. 遙向佛禮。未舉頭頃. 爾時世尊. 在耆 闍崛山. 知韋提希心之所念。卽敕大目犍連. 及 以阿難.從空而來。佛從耆闍崛山沒.於王宮出。 時韋提希. 禮已舉頭. 見世尊釋迦牟尼佛. 身紫 金色. 坐百寶蓮華。目連侍左. 阿難侍右。釋梵 護世諸天. 在虚空中. 普雨天華. 持用供養。時 韋提希. 見佛世尊. 自絕瓔珞. 舉身投地. 號泣 向佛。白言. 世尊. 我宿何罪. 生此惡子。世尊復有何等因緣. 與提婆達多. 共爲眷屬。唯願世尊. 爲我廣說無憂惱處. 我當往生. 不樂閻浮提濁惡世也。此濁惡處. 地獄餓鬼畜生盈滿. 多不善聚。願我未來. 不聞惡聲. 不見惡人。今向世尊. 五體投地. 求哀懺悔。唯願佛日. 教我觀於清淨業處。

爾時世尊.放眉間光。其光金色.徧照十方無量世界。還住佛頂.化爲金臺.如須彌山。十方諸佛淨妙國土.皆於中現。或有國土.七寶合成。復有國土.純是蓮華。復有國土.如自在天宮。復有國土.如玻瓈鏡。十方國土.皆於中現。有如是等無量諸佛國土.嚴顯可觀.令韋提希見。時韋提希白佛言.世尊.是諸佛土.雖復清淨.皆有光明。我今樂生極樂世界阿彌陀佛所.唯願世尊.教我思惟.教我正受。

爾時世尊.卽便微笑.有五色光.從佛口出。一一光照頻婆娑羅王頂。爾時大王.雖在幽閉.心眼無障。遙見世尊.頭面作禮。自然增進.成阿那含。

爾時世尊. 告韋提希. 汝今知不. 阿彌陀佛. 去此不遠。汝當繫念. 諦觀彼國. 淨業成者。

我今爲汝廣說衆譬.亦令未來世一切凡夫.欲修淨業者得生西方極樂國土。欲生彼國者.當修三福。一者.孝養父母.奉事師長.慈心不殺.修十善業。二者.受持三歸.具足衆戒.不犯威儀。三者.發菩提心.深信因果.讀誦大乘.勸進行者。如此三事.名爲淨業。佛告韋提希.汝今知不.此三種業.乃是過去未來現在.三世諸佛.淨業正因。

佛告阿難.及韋提希.諦聽諦聽.善思念之。如來今者.爲未來世一切衆生.爲煩惱賊之所害者.說清淨業。善哉韋提希.快問此事。阿難.汝當受持.廣爲多衆.宣說佛語。如來今者.教韋提希.及未來世一切衆生.觀於西方極樂世界。以佛力故.當得見彼清淨國土。如執明鏡.自見面像。見彼國土極妙樂事.心歡喜故.應時卽得無生法忍。佛告韋提希.汝是凡夫.心想贏劣.未得天眼.不能遠觀。諸佛如來.有異方便.令汝得見。時韋提希白佛言.世尊.如我今者.以佛力故.見彼國土。若佛滅後.諸衆生等.濁惡不善.五苦所逼.云何當見阿彌陀佛極樂世界。

佛告韋提希. 汝及衆生. 應當專心繫念一處. 想於西方。云何作想. 凡作想者. 一切衆生. 自

非生盲.有目之徒.皆見日沒。當起想念.正坐西向.諦觀於日欲沒之處.令心堅住.專想不移。見日欲沒.狀如懸鼓。旣見日已.閉目開目.皆令明了.是爲日想.名曰初觀。

次作水想。見水澄清.亦令明了.無分散意。旣見水已.當起冰想。見冰映徹.作瑠璃想。此想成已.見瑠璃地.內外映徹。下有金剛七寶金幢.擎瑠璃地。其幢八方.八楞具足。——方面.百寶所成。——寶珠.有千光明。——光明.八萬四千色.映瑠璃地.如億千日.不可具見。瑠璃地上.以黃金繩.雜廁閒錯。以七寶界.分齊分明。——寶中.有五百色光。其光如華.又似星月。懸處虛空.成光明臺。樓閣千萬.百寶合成。於臺兩邊.各有百億華幢.無量樂器.以爲莊嚴。八種清風.從光明出.鼓此樂器.演說苦空無常無我之音。是爲水想.名第二觀。

此想成時. 一一觀之. 極令了了。閉目開目. 不令散失。唯除食時. 恆憶此事。如此想者. 名爲麤見極樂國地。若得三昧. 見彼國地. 了了分明. 不可具說。是爲地想. 名第三觀。佛告阿難. 汝持佛語. 爲未來世一切大衆. 欲脫苦者. 說是觀地法。若觀是地者. 除八十億劫生死之罪。捨身

他世. 必生淨國. 心得無疑。作是觀者. 名爲正觀。若他觀者. 名爲邪觀。

佛告阿難.及韋提希.地想成已.次觀寶樹。 觀寶樹者. 一一觀之. 作七重行樹想。一一樹. 高 八千由旬。其諸寶樹. 七寶華葉. 無不具足。一 一華葉. 作異寶色。瑠璃色中. 出金色光。玻瓈 色中. 出紅色光。碼碯色中. 出硨磲光。硨磲色 中. 出綠眞珠光。珊瑚琥珀. 一切衆寶. 以爲映 飾。妙眞珠網. 彌覆樹上。一一樹上. 有七重網。 一一網間. 有五百億妙華宮殿. 如梵王宮。諸天 童子. 自然在中。——童子. 五百億釋迦毗楞伽 摩尼. 以爲瓔珞。其摩尼光. 照百由旬. 猶如和 合百億日月. 不可具名。衆寶閒錯. 色中上者。 此諸寶樹. 行行相當. 葉葉相次。於衆葉間. 生 諸妙華. 華上自然有七寶果。——樹葉. 縱廣正 等二十五由旬。其葉千色.有百種畫.如天瓔珞。 有衆妙華.作閻浮檀金色。如旋火輪.宛轉葉間。 涌生諸果,如帝釋瓶。有大光明,化成幢旛無量 寶蓋。是寶蓋中. 映現三千大千世界. 一切佛事。 十方佛國,亦於中現。見此樹已,亦當次第一一 觀之。觀見樹莖枝葉華果. 皆令分明。是爲樹 想. 名第四觀。

次當想水。欲想水者.極樂國土.有八池水。一一池水.七寶所成。其寶柔輕.從如意珠王生.分爲十四支。一一支.作七寶妙色。黃金爲渠.渠下皆以雜色金剛.以爲底沙。一一水中.有六十億七寶蓮華。一一蓮華.團圓正等十二由旬。其摩尼水.流注華間.尋樹上下。其聲微妙.演說苦空無常無我諸波羅蜜。復有讚歎諸佛相好者。如意珠王.涌出金色.微妙光明。其光化爲百寶色鳥.和鳴哀雅.常讚念佛念法念僧。是爲八功德水想.名第五觀。

衆寶國土. 一一界上. 有五百億寶樓。其樓閣中. 有無量諸天. 作天伎樂。又有樂器. 懸處虛空. 如天寶幢. 不鼓自鳴。此衆音中. 皆說念佛念法念比丘僧。此想成已. 名爲麤見極樂世界寶樹寶地寶池. 是爲總觀想. 名第六觀。若見此者. 除無量億劫極重惡業. 命終之後. 必生彼國。作是觀者. 名爲正觀。若他觀者. 名爲邪觀。

佛告阿難.及韋提希.諦聽諦聽.善思念之.吾當爲汝分別解說除苦惱法。汝等憶持.廣 爲大衆.分別解說。說是語時.無量壽佛.住立空中。觀世音.大勢至.是二大士.侍立左右。 光明熾盛.不可具見。百千閻浮檀金色.不得爲

比。時韋提希. 見無量壽佛已. 接足作禮。白佛 言. 世尊. 我今因佛力故. 得見無量壽佛. 及二 菩薩。未來衆生.當云何觀無量壽佛.及二菩薩。 佛告韋提希, 欲觀彼佛者, 常起想念, 於七寶地 上. 作蓮華想。令其蓮華. 一一葉上. 作百寶色。 有八萬四千脈. 猶如天畫。脈有八萬四千光. 了 了分明. 皆令得見。華葉小者. 縱廣二百五十由 旬。如是蓮華. 具有八萬四千葉。——葉間. 有 百億摩尼珠王.以爲映飾。一一摩尼珠.放千光 明。其光如蓋. 七寶合成. 徧覆地上。釋迦毗楞 伽寶,以爲其臺。此蓮華臺,八萬金剛甄叔迦 寶. 梵摩尼寶. 妙眞珠網. 以爲校飾。於其臺上. 自 然而有四柱寶幢。一一寶幢.如百千萬億須彌山。 幢上寶幔.如夜摩天宮。復有五百億微妙寶珠.以 爲映飾。——寶珠. 有八萬四千光。——光. 作 八萬四千異種金色。——金色. 徧其寶土. 處處 變化. 各作異相。或爲金剛臺. 或作眞珠網. 或 作雜華雲,於十方面,隨意變現,施作佛事。是 爲華座想. 名第七觀。佛告阿難. 如此妙華. 是 本法藏比丘願力所成。若欲念彼佛者, 常先作此 華座想。作此想時.不得雜觀。皆應一一觀之.一 一葉. 一一珠. 一一光. 一一臺. 一一幢. 皆令

分明。如於鏡中. 自見面像。此想成者. 滅除五萬億劫生死之罪. 必定當生極樂世界。作是觀者. 名爲正觀。若他觀者. 名爲邪觀。

佛告阿難.及韋提希.見此事已.次當想佛。 所以者何. 諸佛如來. 是法界身. 入一切衆生心 想中。是故汝等心想佛時,是心卽是三十二相,八 十隨形好。是心作佛,是心是佛。諸佛正徧知 海. 從心想生。是故應當一心繫念. 諦觀彼佛多 陀阿伽度. 阿羅訶. 三藐三佛陀。想彼佛者. 先 當想像。閉目開目.見一寶像.如閻浮檀金色.坐 彼華上。見像坐已.心眼得開.了了分明。見極 樂國七寶莊嚴。寶地寶池. 寶樹行列。諸天寶 慢. 彌覆其上. 衆寶羅網. 滿虛空中。見如此事. 極 今明了. 如觀掌中。見此事已. 復當更作一大蓮 華. 在佛左邊. 如前蓮華. 等無有異。復作一大 蓮華. 在佛右邊。想一觀世音菩薩像. 坐左華 座. 亦作金色. 如前無異。想一大勢至菩薩像. 坐 右華座。此想成時, 佛菩薩像, 皆放光明。其光 金色. 照諸寶樹。——樹下. 亦有三蓮華。諸蓮 華上. 各有一佛二菩薩像. 徧滿彼國。此想成 時. 行者當聞水流光明. 及諸寶樹. 鳧鴈鴛鴦. 皆 說妙法。出定入定. 恆聞妙法。行者所聞. 出定 之時. 憶持不捨. 令與修多羅合。若不合者. 名爲妄想。若與合者. 名爲麤想見極樂世界。是爲像想. 名第八觀。作是觀者. 除無量億劫生死之罪. 於現身中. 得念佛三昧。

佛告阿難.及韋提希.此想成已.次當更觀 無量壽佛身相光明。阿難當知,無量壽佛,身如 百千萬億夜摩天閻浮檀金色。佛身高六十萬億那 由他恆河沙由旬。眉間白毫. 右旋宛轉. 如五須 彌山。佛眼如四大海水.青白分明。身諸毛孔.演 出光明. 如須彌山。彼佛圓光. 如百億三千大千 世界。於圓光中. 有百萬億那由他恆河沙化佛。 一一化佛. 亦有衆多無數化菩薩. 以爲侍者。無 量壽佛. 有八萬四千相。——相中. 各有八萬四 千隨形好。——好中. 復有八萬四千光明。—— 光明. 徧照十方世界念佛衆生. 攝取不捨。其光 相好. 及與化佛. 不可具說。但當憶想. 令心眼 見。見此事者. 卽見十方一切諸佛。以見諸佛 故, 名念佛三昧。作是觀者, 名觀一切佛身。以 觀佛身故,亦見佛心。佛心者,大慈悲是。以無 緣慈. 攝諸衆生。作此觀者. 捨身他世. 生諸佛 前. 得無生忍。是故智者. 應當繫心. 諦觀無量 壽佛。觀無量壽佛者.從一相好入。但觀眉間白

毫.極令明了。見眉間白毫相者.八萬四千相好.自然當現。見無量壽佛者.卽見十方無量諸佛。得見無量諸佛故.諸佛現前授記。是爲徧觀一切色身相.名第九觀。作是觀者.名爲正觀。若他觀者.名爲邪觀。

佛告阿難. 及韋提希. 見無量壽佛了了分明 已. 次亦應觀觀世音菩薩。此菩薩身長八十萬億 那由他由旬.身紫金色。頂有肉髻.項有圓光.面 各百千由旬。其圓光中. 有五百化佛. 如釋迦牟 尼。一一化佛. 有五百化菩薩. 無量諸天. 以爲 侍者。舉身光中. 五道衆生. 一切色相. 皆於中 現。頂上毗楞伽摩尼寶以爲天冠。其天冠中. 有 一立化佛. 高二十五由旬。觀世音菩薩. 面如閻 浮檀金色。眉間毫相. 備七寶色. 流出八萬四千 種光明。——光明. 有無量無數百千化佛。—— 化佛. 無數化菩薩以爲侍者. 變現自在. 滿十方 世界。臂如紅蓮華色. 有八十億微妙光明. 以爲 瓔珞。其瓔珞中. 普現一切諸莊嚴事。手掌作五 百億雜蓮華色。手十指端. ——指端. 有八萬四 千畫. 猶如印文。一一畫. 有八萬四千色。一 色. 有八萬四千光. 其光柔輕. 普照一切。以此 寶手. 接引衆生。舉足時. 足下有千輻輪相. 自

然化成五百億光明臺。下足時.有金剛摩尼華.布散一切.莫不彌滿。其餘身相.衆好具足.如佛無異。唯頂上肉髻.及無見頂相.不及世尊。是爲觀觀世音菩薩眞實色身相.名第十觀。佛告阿難.若欲觀觀世音菩薩者.當作是觀。作是觀者.不遇諸禍.淨除業障.除無數劫生死之罪。如此菩薩.但聞其名.獲無量福.何况諦觀。若有欲觀觀世音菩薩者.先觀頂上肉髻.次觀天冠。其餘衆相.亦次第觀之。悉令明了.如觀掌中。作是觀者.名爲正觀。若他觀者.名爲邪觀。

次觀大勢至菩薩。此菩薩身量大小.亦如觀世音。圓光面各百二十五由旬.照二百五十由旬。舉身光明.照十方國.作紫金色。有緣衆生.皆悉得見。但見此菩薩一毛孔光.卽見十方無量諸佛淨妙光明。是故號此菩薩名無邊光。以智慧光.普照一切.令離三途.得無上力。是故號此菩薩名大勢至。此菩薩天冠.有五百寶華。一一寶華.有五百寶臺。一一臺中.十方諸佛淨妙國土廣長之相.皆於中現。頂上肉髻.如鉢頭摩華。於肉髻上.有一寶瓶.盛諸光明.普現佛事。餘諸身相.如觀世音.等無有異。此菩薩行時.十方世界.一切震動。當地動處.有五百億寶華。

一一寶華. 莊嚴高顯. 如極樂世界。此菩薩坐時. 七寶國土. 一時動搖。從下方金光佛刹. 乃至上方光明王佛刹. 於其中間. 無量塵數分身無量壽佛. 分身觀世音. 大勢至. 皆悉雲集極樂國土。畟塞空中. 坐蓮華座. 演說妙法. 度苦衆生。作此觀者. 名爲觀見大勢至菩薩。是爲觀大勢至色身相。觀此菩薩者. 名第十一觀。除無數劫阿僧祇生死之罪。作是觀者. 不處胞胎. 常遊諸佛淨妙國土。此觀成已. 名爲具足觀觀世音大勢至。

見此事時.當起自心.生於西方極樂世界.於蓮華中.結跏趺坐。作蓮華合想.作蓮華開想。 蓮華開時.有五百色光.來照身想。眼目開想.見 佛菩薩滿虛空中。水鳥樹林.及與諸佛.所出音聲.皆演妙法.與十二部經合。若出定之時.憶持不失。見此事已.名見無量壽佛極樂世界。是爲普觀想.名第十二觀。無量壽佛.化身無數.與觀世音.及大勢至.常來至此行人之所。

佛告阿難.及韋提希.若欲至心生西方者.先 當觀於一丈六像.在池水上。如先所說無量壽 佛.身量無邊.非是凡夫心力所及。然彼如來宿 願力故.有憶想者.必得成就。但想佛像.得無 量福.况復觀佛具足身相。阿彌陀佛.神通如 意.於十方國.變現自在。或現大身.滿虛空中。或現小身.丈六八尺。所現之形.皆眞金色。圓光化佛.及寶蓮華.如上所說。觀世音菩薩.及大勢至.於一切處.身同衆生。但觀首相.知是觀世音.知是大勢至。此二菩薩.助阿彌陀佛普化一切。是爲雜想觀.名第十三觀。

佛告阿難. 及韋提希. 上品上生者. 若有衆 生. 願生彼國者. 發三種心. 卽便往生。何等爲 三. 一者至誠心. 二者深心. 三者迴向發願心。 具三心者.必生彼國。復有三種衆生.當得往生。 何等爲三. 一者慈心不殺. 具諸戒行。二者讀誦 大乘方等經典。三者修行六念. 迴向發願. 願生 彼國。具此功德. 一日乃至七日. 卽得往生。生 彼國時. 此人精進勇猛故. 阿彌陀如來. 與觀世 音. 大勢至. 無數化佛. 百千比丘. 聲聞大衆. 無 量諸天. 七寶宮殿。觀世音菩薩. 執金剛臺. 與 大勢至菩薩. 至行者前。阿彌陀佛. 放大光明. 照 行者身。與諸菩薩,授手迎接。觀世音,大勢至,與 無數菩薩. 讚歎行者. 勸進其心。行者見已. 歡 喜踊躍。自見其身. 乘金剛臺. 隨從佛後. 如彈 指頃. 往生彼國。生彼國已. 見佛色身. 衆相具 足。見諸菩薩. 色相具足。光明寶林. 演說妙法。

聞已. 卽悟無生法忍。經須臾間. 歷事諸佛. 徧 十方界。於諸佛前,次第受記。還至本國,得無 量百千陀羅尼門。是名上品上生者。上品中生 者,不必受持讀誦方等經典。善解義趣,於第一 義.心不驚動.深信因果.不謗大乘。以此功德.迴 向願求生極樂國。行此行者, 命欲終時, 阿彌陀 佛. 與觀世音. 大勢至. 無量大衆. 眷屬圍繞. 持 紫金臺. 至行者前。讚言. 法子. 汝行大乘. 解 第一義. 是故我今來迎接汝。與千化佛. 一時授 手。行者自見坐紫金臺, 合掌叉手, 讚歎諸佛。 如一念頃, 卽生彼國七寶池中。此紫金臺, 如大 寶華. 經宿則開。行者身作紫磨金色. 足下亦有 七寶蓮華。佛及菩薩. 俱時放光. 照行者身。目 卽開明. 因前宿習. 普聞衆聲. 純說甚深第一義 諦。卽下金臺.禮佛合掌.讚歎世尊。經於七日.應 時卽於阿耨多羅三藐三菩提. 得不退轉。應時卽 能飛行徧至十方. 歷事諸佛。於諸佛所. 修諸三 昧。經一小劫,得無生忍,現前受記。是名上品 中生者。上品下生者.亦信因果.不謗大乘。但 發無上道心,以此功德,迴向願求生極樂國。行 者命欲終時. 阿彌陀佛. 及觀世音. 大勢至與諸 菩薩, 持金蓮華, 化作五百佛, 來迎此人。五百

化佛.一時授手。讚言.法子.汝今清淨.發無上道心.我來迎汝。見此事時.卽自見身坐金蓮華。坐已華合.隨世尊後.卽得往生七寶池中。一日一夜.蓮華乃開。七日之中.乃得見佛。雖見佛身.於衆相好.心不明了。於三七日後.乃了了見。聞衆音聲.皆演妙法。遊歷十方.供養諸佛。於諸佛前.聞甚深法。經三小劫.得百法明門.住歡喜地。是名上品下生者。是名上輩生想.名第十四觀。

佛告阿難. 及韋提希. 中品上生者. 若有衆 生,受持五戒,持八戒齋,修行諸戒,不造五逆,無 衆過患。以此善根. 迴向願求生於西方極樂世界。 臨命終時,阿彌陀佛,與諸比丘,眷屬圍繞,放 金色光. 至其人所。演說苦空無常無我。讚歎出 家. 得離衆苦。行者見已. 心大歡喜。自見己身. 坐 蓮華臺. 長跪合掌. 爲佛作禮。未舉頭頃. 卽得 往生極樂世界. 蓮華尋開。當華敷時. 聞衆音 聲. 讚歎四諦。應時卽得阿羅漢道. 三明六通. 具 八解脫。是名中品上生者。中品中生者. 若有衆 生. 若一日一夜持八戒齋. 若一日一夜持沙彌 戒. 若一日一夜持具足戒. 威儀無缺。以此功 德. 迴向願求生極樂國。戒香熏修. 如此行者. 命

欲終時. 見阿彌陀佛. 與諸眷屬. 放金色光. 持 七寶蓮華. 至行者前。行者自聞空中有聲. 言. 善男子. 如汝善人. 隨順三世諸佛敎故. 我 來迎汝。行者自見坐蓮華上, 蓮華卽合, 生於西 方極樂世界。在寶池中, 經於七日, 蓮華乃敷。 華旣敷已. 開目合掌. 讚歎世尊。聞法歡喜. 得 須陀洹。經半劫已.成阿羅漢。是名中品中生者。 中品下生者. 若有善男子. 善女人. 孝養父母. 行 世仁慈。此人命欲終時. 遇善知識. 爲其廣說阿 彌陀佛國土樂事.亦說法藏比丘四十八願。聞此 事已, 尋卽命終。譬如壯士屈伸臂頃, 卽生西方 極樂世界。經七日已. 遇觀世音. 及大勢至。聞 法歡喜. 得須陀洹。過一小劫. 成阿羅漢。是名 中品下生者。是名中輩生想. 名第十五觀。

佛告阿難.及韋提希.下品上生者.或有衆生.作衆惡業。雖不誹謗方等經典.如此愚人.多造惡法.無有慚愧。命欲終時.遇善知識.爲說大乘十二部經首題名字。以聞如是諸經名故.除卻千劫極重惡業。智者復敎合掌叉手.稱南無阿彌陀佛。稱佛名故.除五十億劫生死之罪。爾時彼佛.卽遣化佛.化觀世音.化大勢至.至行者前。讚言.善男子.以汝稱佛名故.諸罪消滅.我

來迎汝。作是語已. 行者卽見化佛光明. 徧滿其 室。見已歡喜.即便命終。乘寶蓮華.隨化佛後.生 寶池中。經七七日. 蓮華乃敷。當華敷時. 大悲 觀世音菩薩,及大勢至菩薩,放大光明,住其人 前.爲說甚深十二部經。聞已信解.發無上道心。 經十小劫. 具百法明門. 得入初地。是名下品上 生者。佛告阿難.及韋提希.下品中生者.或有 衆生. 毀犯五戒. 八戒. 及具足戒。如此愚人. 偷 僧祇物. 盜現前僧物. 不淨說法. 無有慚愧. 以 諸惡業而自莊嚴。如此罪人, 以惡業故, 應墮地 獄。命欲終時.地獄衆火.一時俱至。遇善知識.以 大慈悲. 卽爲讚說阿彌陀佛十力威德. 廣讚彼佛 光明神力。亦讚戒、定、慧、解脫、解脫知見。 此人聞已. 除八十億劫生死之罪。地獄猛火. 化 爲清涼風.吹諸天華。華上皆有化佛菩薩.迎接 此人。如一念頃. 即得往生七寶池中蓮華之內。 經於六劫. 蓮華乃敷。觀世音. 大勢至. 以梵音 聲. 安慰彼人. 爲說大乘甚深經典。聞此法已. 應 時卽發無上道心。是名下品中生者。佛告阿難.及 韋提希. 下品下生者. 或有衆生. 作不善業. 五 逆十惡. 具諸不善。如此愚人. 以惡業故. 應墮 惡道. 經歷多劫. 受苦無窮。如此愚人. 臨命終

時. 遇善知識. 種種安慰. 爲說妙法. 教令念佛。彼人苦逼. 不遑念佛。善友告言. 汝若不能念彼佛者. 應稱無量壽佛。如是至心. 令聲不絕. 具足十念. 稱南無阿彌陀佛。稱佛名故. 於念念中. 除八十億劫生死之罪。命終之時. 見金蓮華. 猶如日輪. 住其人前。如一念頃. 卽得往生極樂世界。於蓮華中. 滿十二大劫. 蓮華方開。觀世音. 大勢至. 以大悲音聲. 爲其廣說諸法實相. 除滅罪法。聞已歡喜. 應時卽發菩提之心。是名下品下生者。是名下輩生想. 名第十六觀。

說是語時、韋提希、與五百侍女、聞佛所說、應時卽見極樂世界廣長之相。得見佛身、及二菩薩。心生歡喜、歎未曾有。豁然大悟、逮無生忍。五百侍女、發阿耨多羅三藐三菩提心、願生彼國。世尊悉記、皆當往生。生彼國已、獲得諸佛現前三昧。無量諸天、發無上道心。爾時阿難、卽從座起、白佛言、世尊、當何名此經。此法之要、當云何受持。佛告阿難、此經名觀極樂國土、無量壽佛、觀世音菩薩、大勢至菩薩。亦名淨除業障、生諸佛前。汝當受持、無令忘失。行此三昧者、現身得見無量壽佛、及二大士。若善男子、及善女人、但聞佛名、二菩薩名、除無

量劫生死之罪.何况憶念。若念佛者.當知此人.則是人中分陀利華。觀世音菩薩.大勢至菩薩.爲其勝友。當坐道場.生諸佛家。佛告阿難.汝好持是語。持是語者.卽是持無量壽佛名。佛說此語時.尊者目犍連.尊者阿難.及韋提希等.聞佛所說.皆大歡喜。

爾時世尊.足步虛空.還耆闍崛山。爾時阿難.廣爲大衆.說如上事。無量諸天.龍.夜叉.聞佛所說.皆大歡喜.禮佛而退。

佛說觀無量壽佛經

音釋:

深子皓切 酥素姑切 鷹隼^{集思準} 憔悴^{惟音樵悴音萃憔悴} 贏劣 贏倫為切瘦也 分齊切分齊限量也 正觀 行行切 罗塞^{夏正作則} 安惠 遊也塞悉 誹謗詩補曠切毀也

佛說無量壽經卷上

曹魏康僧鎧譯

我聞如是.一時.佛住王舍城.耆闍崛山中。 與大比丘衆萬二千人俱,一切大聖,神通已達。 其名曰. 尊者了本際. 尊者正願. 尊者正語. 尊 者大號. 尊者仁賢. 尊者離垢. 尊者名聞. 尊者 善實. 尊者具足. 尊者牛王. 尊者優樓頻螺迦 葉. 尊者伽耶迦葉. 尊者那提迦葉. 尊者摩訶迦 葉, 尊者舍利弗, 尊者大目犍連, 尊者劫賓那, 尊 者大住. 尊者大淨志. 尊者摩訶周那. 尊者滿願 子. 尊者離障. 尊者流灌. 尊者堅伏. 尊者面王. 尊 者異乘. 尊者仁性. 尊者嘉樂. 尊者善來. 尊者 羅云. 尊者阿難. 皆如斯等上首者也。又與大乘 衆菩薩俱. 普賢菩薩. 妙德菩薩. 慈氏菩薩等. 此 賢劫中一切菩薩。又賢護等十六正士. 善思議菩 薩. 信慧菩薩. 空無菩薩. 神通華菩薩. 光英菩 薩. 慧上菩薩. 智幢菩薩. 寂根菩薩. 願慧菩薩. 香 象菩薩, 寶英菩薩, 中住菩薩, 制行菩薩, 解脫 菩薩. 皆遵普賢大士之德. 具諸菩薩無量行願. 安 住一切功德之法。遊步十方. 行權方便。入佛法

藏. 究竟彼岸。於無量世界. 現成等覺。處兜術 天. 弘宣正法。捨彼天宫. 降神母胎。從右脅生. 現 行七步。光明顯耀. 普照十方。無量佛土. 六種 震動。舉聲自稱. 吾當於世. 爲無上尊。釋梵奉 侍. 天人歸仰。示現算計文藝射御. 博綜道術. 貫 練羣籍。遊於後園. 講武試藝。現處宮中色味之 間。見老病死. 悟世非常。棄國財位. 入山學道。 服乘白馬. 寶冠瓔珞. 遣之令還。捨珍妙衣. 而 著法服。剃除鬚髮、端坐樹下、勤苦六年、行如 所應。現五濁刹.隨順羣生。示有塵垢.沐浴金 流。天案樹枝、得攀出池。靈禽翼從、往詣道場。 吉祥感徵.表章功祚。哀受施草.敷佛樹下.跏 趺而坐。奮大光明, 使魔知之。魔率官屬, 而來 逼試。制以智力. 皆令降伏。得微妙法. 成最正 覺。釋梵祈勸.請轉法輪。以佛遊步.佛吼而吼。 扣法鼓. 吹法螺. 執法劍. 建法幢. 震法雷. 曜 法電. 澍法雨. 演法施。常以法音. 覺諸世間。 光明普照無量佛土。一切世界六種震動。總攝魔 界.動魔宮殿。衆魔慴怖.莫不歸伏。摑裂邪網.消 滅諸見。散諸塵勞. 壞諸欲漸。嚴護法城. 開闡 法門。洗濯垢汙. 顯明清白。光融佛法. 宣流正 化。入國分衞.獲諸豐饒。貯功德.示福田。欲

宣法. 現欣笑。以諸法藥. 救療三苦。顯現道意 無量功德。授菩薩記. 成等正覺。示現滅度. 拯 濟無極。消除諸漏. 植衆德本。具足功德. 微妙 難量。游諸佛國、普現道教。其所修行、清淨無 穢。譬如幻師. 現衆異像。爲男爲女. 無所不變。 本學明了. 在意所爲。此諸菩薩. 亦復如是。學 一切法. 貫綜縷練。所住安諦. 靡不感化。無數 佛土. 皆悉普現。未曾慢恣. 愍傷衆生。如是之 法.一切具足。菩薩經典.究暢要妙。名稱普至.道 御十方。無量諸佛. 咸共護念。佛所住者. 皆已 得住。大聖所立. 而皆已立。如來道化. 各能宣 布。爲諸菩薩. 而作大師。以甚深禪慧. 開導衆 生。通諸法性. 達衆生相。明了諸國. 供養諸佛。 化現其身. 猶如電光。善學無畏之網. 曉了幻化 之法。壞裂魔網. 解諸纏縛。超越聲聞緣覺之 地. 得空無相無願三昧。善立方便. 顯示三乘。 於此化終,而現滅度。亦無所作,亦無所有。不 起不滅,得平等法。具足成就無量總持百千三昧。 諸根智慧. 廣普寂定。深入菩薩法藏. 得佛華嚴 三昧, 宣揚演說一切經典。住深定門, 悉覩現在 無量諸佛。一念之頃. 無不周徧。濟諸劇難. 諸 閑不閑。分別顯示眞實之際. 得諸如來辯才之智。

入衆言音. 開化一切。超過世間諸所有法. 心常諦住度世之道。於一切萬物. 而隨意自在。爲諸庶類. 作不請之友。荷負羣生. 爲之重擔。受持如來甚深法藏。護佛種性. 常使不絕。興大悲. 愍衆生。演慈辯. 授法眼。杜三趣. 開善門。以不請之法. 施諸黎庶。如純孝之子. 愛敬父母。於諸衆生. 視若自己。一切善本. 皆度彼岸。悉獲諸佛無量功德。智慧聖明. 不可思議。如是之等菩薩大士. 不可稱計. 一時來會。

爾時世尊.諸根悅豫.姿色清淨.光顏巍巍。 尊者阿難,承佛聖旨,卽從座起,偏袒右肩,長 跪合掌,而白佛言。今日世尊,諸根悅豫,姿色 清淨. 光顏巍巍。如明鏡淨. 影暢表裏。威容顯 耀. 超絕無量。未常瞻覩殊妙如今。唯然大聖。 我心念言. 今日世尊住奇特之法. 今日世雄住諸 佛所住. 今日世眼住導師之行. 今日世英住最勝 之道. 今日天尊行如來之德。去來現在佛佛相 念,得無今佛念諸佛耶。何故威神光光乃爾。於 是世尊告阿難曰.云何阿難.諸天敎汝來問佛 耶. 自以慧見問威顏平。阿難白佛. 無有諸天來 教我者. 自以所見問斯義耳。佛言. 善哉阿難. 所 問甚快。發深智慧. 真妙辯才. 愍念衆生. 問斯 慧義。如來以無盡大悲. 矜哀三界. 所以出興於世. 光闡道教。欲拯濟羣萌. 惠以眞實之利。無量億劫. 難值難見。猶靈瑞華. 時時乃出。今所問者. 多所饒益. 開化一切諸天人民。阿難當知. 如來正覺. 其智難量. 多所導御。慧見無礙. 無能遏絕。以一餐之力. 能住壽命億百千劫. 無數無量. 復過於此. 諸根悅豫. 不以毀損. 姿色不變. 光顏無異。所以者何. 如來定慧. 究暢無極。於一切法. 而得自在。阿難諦聽. 今爲汝說。對曰. 唯然. 願樂欲聞。

佛告阿難. 乃往過去久遠無量不可思議無央數劫. 錠光如來. 興出於世. 教化度脫無量衆生. 皆令得道. 乃取滅度。次有如來. 名曰光遠。次名月光。次名栴檀香。次名善山王。次名須彌天冠。次名須彌等曜。次名月色。次名正念。次名離垢。次名無著。次名龍天。次名夜光。次名安明頂。次名不動地。次名瑠璃妙華。次名瑠璃金色。次名金藏。次名炎光。次名炎根。次名地種。次名月像。次名日音。次名解脫華。次名莊嚴光明。次名海覺神通。次名水光。次名大香。次名離塵垢。次名捨厭意。次名寶炎。次名妙頂。次名勇立。次名功德持慧。次名蔽日月光。次名

日月瑠璃光。次名無上瑠璃光。次名最上首。次名菩提華。次名月明。次名日光。次名華色王。次名水月光。次名除癡冥。次名度蓋行。次名淨信。次名善宿。次名威神。次名法慧。次名鸞音。次名師子音。次名龍音。次名處世。如此諸佛.皆悉已過。爾時.次有佛.名世自在王.如來.應供.等正覺.明行足.善逝.世間解.無上士.調御丈夫.天人師.佛.世尊。時有國王.聞佛說法.心懷悅豫.尋發無上正眞道意。棄國捐王.行作沙門.號曰法藏。高才勇哲.與世超異。詣世自在王如來所.稽首佛足.右繞三市.長跪合掌.以頌讚曰。

如是炎明 無與等者 光顏巍巍 威神無極 日月摩尼 珠光燄耀 皆悉隱蔽 猶如聚墨 響流十方 如來顏容 招世無倫 正覺大音 戒聞精進 三昧智慧 威德無侶 殊勝希有 深諦善念 諸佛法海 窮深盡奧 究其涯底 無明欲怒 世尊永無 人雄師子 神德無量 震動大千 功勳廣大 智慧深妙 光明威相 齊聖法王 靡不解脫 願我作佛 過度生死 布施調意 戒忍精進 如是三昧 智慧爲上 吾誓得佛 一切恐懼 普行此願 爲作大安

數如恆沙 假令有佛 百千億萬 無量大聖 斯等諸佛 堅正不卻 供養一切 不如求道 譬如恆沙 諸佛世界 復不可計 無數刹土 光明悉照 徧此諸國 如是精谁 威神難量 今我作佛 其衆奇妙 道場超絕 國土第一 國如泥洹 而無等雙 我當愍哀 度脫一切 十方來生 心悅清淨 已至我國 快樂安隱 幸佛明信 是我真證 力精所欲 發願於彼 智慧無礙 知我心行 十方世尊 常令此尊 假使身止 諸苦毒中 我行精谁 忍終不悔

佛告阿難.法藏比丘.說此頌已.而白佛言。 唯然世尊.我發無上正覺之心。願佛爲我廣宣經 法.我當修行.攝取佛國清淨莊嚴無量妙土。令 我於世.速成正覺.拔諸生死勤苦之本。佛告阿 難.時世自在王佛.語法藏比丘.如所修行.莊 嚴佛土.汝自當知。比丘白佛.斯義弘深.非我 境界。唯願世尊.廣爲敷演諸佛如來淨土之行。 我聞此已.當如說修行.成滿所願。爾時世自在 王佛.知其高明.志願深廣。卽爲法藏比丘而說 經言.譬如大海.一人斗量.經歷劫數.尚可窮 底.得其妙寶。人有至心精進.求道不止.會當 剋果.何願不得。於是世自在王佛.卽爲廣說二 百一十億諸佛刹土.天人之善惡.國土之麤妙.應其心願.悉現與之。時彼比丘.聞佛所說嚴淨國土.皆悉覩見.起發無上殊勝之願。其心寂靜.志無所著。一切世間.無能及者。具足五劫.思惟攝取莊嚴佛國清淨之行。阿難白佛.彼佛國土.壽量幾何。佛言.其佛壽命.四十二劫。時法藏比丘.攝取二百一十億諸佛妙土清淨之行。如是修已.詣彼佛所.稽首禮足.繞佛三帀.合掌而住。白佛言.世尊.我已攝取莊嚴佛土清淨之行。佛告比丘.汝今可說.宜知是時.發起悅可一切大衆。菩薩聞已.修行此法.緣致滿足無量大願。比丘白佛.唯垂聽察.如我所願.當具說之。

設我得佛. 國有地獄餓鬼畜生者. 不取正覺。 設我得佛. 國中天人壽終之後. 復更三惡道 者. 不取正覺。

設我得佛. 國中天人. 不悉眞金色者. 不取 正覺。

設我得佛. 國中天人. 形色不同. 有好醜者. 不取正覺。

設我得佛. 國中天人. 不識宿命. 下至知百 千億那由他諸劫事者. 不取正覺。

設我得佛. 國中天人. 不得天眼. 下至見百

千億那由他諸佛國者. 不取正覺。

設我得佛. 國中天人. 不得天耳. 下至聞百 千億那由他諸佛所說. 不悉受持者. 不取正覺。

設我得佛. 國中天人. 不得見他心智. 下至 知百千億那由他諸佛國中衆生心念者. 不取正覺。

設我得佛.國中天人.不得神足.於一念頃.下至不能超過百千億那由他諸佛國者.不取正覺。

設我得佛. 國中天人. 若起想念貪計身者. 不 取正覺。

設我得佛. 國中天人. 不住定聚. 必至滅度者. 不取正覺。

設我得佛. 光明有限量. 下至不照百千億那由他諸佛國者. 不取正覺。

設我得佛. 壽命有限量. 下至百千億那由他 劫者. 不取正覺。

設我得佛. 國中聲聞. 有能計量. 乃至三千 大千世界衆生. 悉成緣覺. 於百千劫. 悉共計 校. 知其數者. 不取正覺。

設我得佛. 國中天人. 壽命無能限量。除其本願. 修短自在。若不爾者. 不取正覺。

設我得佛. 國中天人. 乃至聞有不善名者. 不

取正覺。

設我得佛. 十方世界無量諸佛. 不悉咨嗟稱 我名者. 不取正覺。

設我得佛. 十方衆生. 至心信樂. 欲生我國.乃至十念.若不生者.不取正覺。唯除五逆.誹謗正法。

設我得佛.十方衆生.發菩提心.修諸功德.至心發願.欲生我國.臨壽終時.假令不與 大衆圍繞現其人前者.不取正覺。

設我得佛.十方衆生.聞我名號.繫念我國.植衆德本.至心迴向.欲生我國.不果遂者.不 取正覺。

設我得佛. 國中天人. 不悉成滿三十二大人相者. 不取正覺。

設我得佛.他方佛土諸菩薩衆.來生我國.究竟必至一生補處。除其本願自在所化。爲衆生故.被弘誓鎧.積累德本.度脫一切。遊諸佛國.修菩薩行.供養十方諸佛如來。開化恆沙無量衆生.使立無上正眞之道.超出常倫諸地之行.現前修習普賢之德。若不爾者.不取正覺。

設我得佛. 國中菩薩. 承佛神力. 供養諸佛. 一食之頃. 不能徧至無數無量億那由他諸佛

國者. 不取正覺。

設我得佛. 國中菩薩. 在諸佛前. 現其德本. 諸所求欲供養之具. 若不如意者. 不取正覺。

設我得佛.國中菩薩.不能演說一切智者.不 取正覺。

設我得佛. 國中菩薩. 不得金剛那羅延身者. 不取正覺。

設我得佛. 國中天人. 一切萬物. 嚴淨光麗. 形色殊特. 窮微極妙. 無能稱量。其諸衆生. 乃至逮得天眼. 有能明了. 辯其名數者. 不取正覺。

設我得佛. 國中菩薩. 乃至少功德者. 不能知見其道場樹無量光色. 高四百萬里者. 不取正覺。

設我得佛. 國中菩薩. 若受讀經法. 諷誦持 說. 而不得辯才智慧者. 不取正覺。

設我得佛. 國中菩薩. 智慧辯才. 若可限量者. 不取正覺。

設我得佛.國土清淨.皆悉照見十方一切無量無數不可思議諸佛世界.猶如明鏡.覩其面像。若不爾者.不取正覺。

設我得佛. 自地以上. 至於虛空. 宮殿樓 觀. 池流華樹. 國土所有一切萬物. 皆以無量雜 實百千種香而共合成。嚴飾奇妙. 超諸天人。其香普熏十方世界。菩薩聞者. 皆修佛行。若不如是. 不取正覺。

設我得佛.十方無量不可思議諸佛世界衆生之類.蒙我光明觸其身者.身心柔輕.超過天人。若不爾者.不取正覺。

設我得佛.十方無量不可思議諸佛世界衆生之類. 聞我名字. 不得菩薩無生法忍諸深總持者. 不取正覺。

設我得佛.十方無量不可思議諸佛世界.其有女人. 聞我名字. 歡喜信樂. 發菩提心. 厭惡女身。壽終之後. 復爲女像者. 不取正覺。

設我得佛.十方無量不可思議諸佛世界諸菩薩衆. 聞我名字. 壽終之後. 常修梵行. 至成佛道。若不爾者. 不取正覺。

設我得佛.十方無量不可思議諸佛世界諸天人民. 聞我名字. 五體投地. 稽首作禮. 歡喜信樂.修菩薩行.諸天世人.莫不致敬。若不爾者.不取正覺。

設我得佛.國中天人.欲得衣服.隨念卽至.如佛所讚應法妙服.自然在身。有求裁縫擣染浣濯者.不取正覺。

設我得佛. 國中天人. 所受快樂. 不如漏盡 比丘者. 不取正覺。

設我得佛.國中菩薩.隨意欲見十方無量嚴淨佛土.應時如願.於寶樹中.皆悉照見.猶如明鏡.覩其面像。若不爾者.不取正覺。

設我得佛.他方國土諸菩薩衆.聞我名字.至 於得佛.諸根缺陋不具足者.不取正覺。

設我得佛.他方國土諸菩薩衆.聞我名字.皆悉逮得清淨解脫三昧。住是三昧.一發意頃.供養無量不可思議諸佛世尊.而不失定意。若不爾者.不取正覺。

設我得佛.他方國土諸菩薩衆.聞我名字.壽 終之後.生尊貴家。若不爾者.不取正覺。

設我得佛.他方國土諸菩薩衆.聞我名字.歡喜踊躍.修菩薩行.具足德本。若不爾者.不取正覺。

設我得佛.他方國土諸菩薩衆.聞我名字.皆悉逮得普等三昧。住是三昧.至於成佛.常見無量不可思議一切諸佛。若不爾者.不取正覺。

設我得佛.國中菩薩.隨其志願所欲聞法.自 然得聞。若不爾者.不取正覺。

設我得佛. 他方國土諸菩薩衆. 聞我名字. 不

卽得至不退轉者. 不取正覺。

設我得佛.他方國土諸菩薩衆.聞我名字.不即得至第一忍.第二第三法忍.於諸佛法.不能即得不退轉者.不取正覺。

佛告阿難.爾時法藏比丘.說此願已.以偈 頌曰。

> 必至無上道 我建超世願 誓不成等覺 斯願不滿足 我於無量劫 不爲大施主 普濟諸貧苦 誓不成等覺 我至成佛道 名聲超十方 誓不成等覺 究竟有不聞 離欲深正念 淨慧修梵行 爲諸天人師 志求無上尊 普照無際土 神力演大光 消除三垢冥 明濟衆戹難 開彼智慧眼 滅此昏盲暗 閉塞諸惡道 诵達善趣門 功祚成滿足 威曜朗十方 日月戢重暉 天光隱不現 爲衆開法藏 廣施功德寶 常於大衆中 說法師子吼

供養一切佛 具足衆德本 願慧悉成滿 得爲三界雄 如佛無礙智 通達靡不照 願我功德力 等此最勝尊 斯願若剋果 大千應感動 虚空諸天神 當雨珍妙華

佛語阿難. 法藏比丘. 說此頌已. 應時普地 六種震動. 天雨妙華. 以散其上。自然音樂. 空 中讚言. 決定必成無上正覺。於是法藏比丘. 具 足修滿如是大願. 誠諦不虛。超出世間. 深樂寂 滅。阿難、法藏比丘、於其佛所、諸天魔梵龍神 八部大衆之中. 發斯弘誓. 建此願已. 一向專志 莊嚴妙土。所修佛國. 開廓廣大. 超勝獨妙。建 立常然.無衰無變。於不可思議兆載永劫.積植 菩薩無量德行。不生欲覺瞋覺害覺,不起欲想瞋 想害想. 不著色聲香味觸法。忍力成就. 不計衆 苦。少欲知足.無染恚癡。三昧常寂.智慧無礙.無 有虚偽諂曲之心。和顏愛語. 先意承問。勇猛精 進. 志願無倦。專求清白之法. 以惠利羣生。恭 敬三寶. 奉事師長。以大莊嚴具足衆行。令諸衆 生功德成就。住空無相無願之法.無作無起.觀 法如化。遠離麤言. 自害害彼. 彼此俱害。修習 善語.自利利人.人我兼利。棄國捐王.絕去財色。自行六波羅蜜.教人令行。無央數劫.積功累德。隨其生處.在意所欲.無量寶藏.自然發應。教化安立無數衆生.住於無上正眞之道。或爲長者居士豪姓尊貴.或爲刹利國君轉輪聖帝.或爲六欲天主.乃至梵王。常以四事.供養恭敬一切諸佛。如是功德.不可稱說。口氣香潔.如優鉢羅華。身諸毛孔.出栴檀香.其香普熏無量世界。容色端正.相好殊妙。其手常出無盡之寶.衣服飲食.珍妙華香.繒蓋幢旛.莊嚴之具。如是等事.超諸天人。於一切法.而得自在。

阿難白佛. 法藏菩薩. 爲已成佛而取滅度. 爲未成佛. 爲今現在。佛告阿難. 法藏菩薩. 今已成佛. 現在西方. 去此十萬億刹。其佛世界. 名曰安樂。阿難又問. 其佛成道已來. 爲經幾時。佛言. 成佛已來. 凡歷十劫。其佛國土. 自然七寶. 金. 銀. 瑠璃. 珊瑚. 琥珀. 硨磲. 碼碯. 合成爲地。恢廓曠蕩. 不可限極。悉相雜廁. 轉相間入。光赫煜爍. 微妙奇麗. 清淨莊嚴。超踰十方一切世界衆寶中精. 其寶猶如第六天寶。又其國土. 無須彌山. 及金剛圍. 一切諸山。亦無大

海小海, 溪渠井谷。佛神力故, 欲見則見。亦無 地獄餓鬼畜生諸難之趣。亦無四時春秋冬夏.不 寒不熱. 常和調適。爾時阿難白佛言. 世尊. 若 彼國土,無須彌山,其四天王,及忉利天,依何 而住。佛語阿難. 第三炎天. 乃至色究竟天. 皆 依何住。阿難白佛. 行業果報不可思議。佛語阿 難. 行業果報不可思議. 諸佛世界亦不可思議. 其 諸衆生功德善力. 住行業之地. 故能爾耳。阿難 白佛. 我不疑此法. 但爲將來衆生. 欲除其疑 惑. 故問斯義。佛告阿難. 無量壽佛. 威神光明. 最 尊第一。諸佛光明,所不能及。或照百佛世界,或 千佛世界, 取要言之, 乃照東方恆沙佛刹。南西 北方,四維上下,亦復如是。或有佛光照於七 尺.或一由旬.二三四五由旬.如是轉倍.乃至 照一佛刹。是故無量壽佛、號無量光佛、無邊光 佛. 無礙光佛. 無對光佛. 炎王光佛. 清淨光佛. 歡 喜光佛. 智慧光佛. 不斷光佛. 難思光佛. 無稱 光佛, 超日月光佛。其有衆生遇斯光者, 三垢消 滅. 身意柔輭. 歡喜踊躍. 善心生焉。若在三塗 極苦之處. 見此光明. 皆得休息. 無復苦惱。壽 終之後. 皆蒙解脫。無量壽佛. 光明顯赫. 照曜 十方。諸佛國土. 莫不聞焉。不但我今稱其光

明. 一切諸佛聲聞緣覺諸菩薩衆. 咸共歎譽. 亦 復如是。若有衆生. 聞其光明威神功德. 日夜稱 說. 至心不斷. 隨意所願. 得生其國。爲諸菩薩 聲聞之衆. 所共歎譽. 稱其功德。至其最後得佛 道時. 普爲十方諸佛菩薩歎其光明. 亦如今也。 佛言. 我說無量壽佛光明威神. 巍巍殊妙. 晝夜 一劫. 尚未能盡。佛語阿難. 又無量壽佛. 壽命 長久. 不可稱計. 汝寧知乎。假使十方世界無量 衆生. 皆得人身. 悉令成就聲聞緣覺. 都共集 會. 禪思一心。竭其智力. 於百千萬劫. 悉共推 算. 計其壽命長遠之數. 不能窮盡. 知其限極。 聲聞菩薩天人之衆.壽命長短.亦復如是.非算 數譬喻所能知也。又聲聞菩薩. 其數難量. 不可 稱說。神智洞達. 威力自在. 能於掌中. 持一切 世界。佛語阿難.彼佛初會聲聞衆數不可稱計.菩 薩亦然。如大目犍連. 百千萬億無量無數. 於阿 僧祇那由他劫.乃至滅度.悉共計校.不能究了 多少之數。譬如大海,深廣無量。假使有人析其 一毛. 以爲百分. 以一分毛. 沾取一渧. 於意云 何.其所渧者.於彼大海.何所爲多。阿難白佛.彼 所渧水. 比於大海多少之量. 非巧歷算數言辭譬 類所能知也。佛語阿難. 如目連等. 於百千萬億

那由他劫. 計彼初會聲聞菩薩. 所知數者. 猶如一渧. 其所不知. 如大海水。

又其國土. 七寶諸樹. 周滿世界。金樹. 銀 瑠璃樹. 玻瓈樹. 珊瑚樹. 碼碯樹. 硨磲之 村_ 樹.或有二寶三寶.乃至七寶.轉共合成。或有 金樹. 銀葉華果。或有銀樹. 金葉華果。或瑠璃 樹.玻瓈爲葉.華果亦然。或水精樹.瑠璃爲葉.華 果亦然。或珊瑚樹. 碼碯爲葉. 華果亦然。或碼 碯樹. 瑠璃爲葉. 華果亦然。或硨磲樹. 衆寶爲 葉. 華果亦然。或有寶樹. 紫金爲本. 白銀爲莖. 瑠 璃爲枝. 水精爲條. 珊瑚爲葉. 碼碯爲華. 硨磲 爲實。或有寶樹. 白銀爲本. 瑠璃爲莖. 水精爲 枝. 珊瑚爲條. 碼碯爲葉. 硨磲爲華. 紫金爲實。 或有寶樹. 瑠璃爲本. 水精爲莖. 珊瑚爲枝. 碼 碯爲條. 硨磲爲葉. 紫金爲華. 白銀爲實。或有 寶樹. 水精爲本. 珊瑚爲莖. 碼碯爲枝. 硨磲爲 條.紫金爲葉.白銀爲華.瑠璃爲實。或有寶樹.珊 瑚爲本. 碼碯爲莖. 硨磲爲枝. 紫金爲條. 白銀 爲葉. 瑠璃爲華. 水精爲實。或有寶樹. 瑪瑙爲 本. 硨磲爲莖. 紫金爲枝. 白銀爲條. 瑠璃爲葉. 水 精爲華. 珊瑚爲實。或有寶樹. 硨磲爲本. 紫金 爲莖. 白銀爲枝. 瑠璃爲條. 水精爲葉. 珊瑚爲 華.碼碯爲實。行行相值.莖莖相望.枝枝相準.葉 葉相向. 華華相順. 實實相當。榮色光曜. 不可 勝視。清風時發. 出五音聲. 微妙宮商. 自然相 和。又無量壽佛,其道場樹,高四百萬里。其本 周圍五千由旬。枝葉四布二十萬里。一切衆寶自 然合成。以月光摩尼持海輪寶. 衆寶之王. 而莊 嚴之。周市條間.垂寶瓔珞.百千萬色.種種異 變.無量光炎.照曜無極。珍妙寶網.羅覆其上。 一切莊嚴. 隨應而現。微風徐動. 吹諸寶樹. 演 出無量妙法音聲。其聲流布. 徧諸佛國。聞其音 者,得深法忍,住不退轉,至成佛道,耳根清徹,不 遭苦患。目覩其色. 鼻知其香. 口嘗其味. 身觸 其光,心以法緣,皆得甚深法忍,住不退轉,至 成佛道. 六根清徹. 無諸惱患。阿難. 若彼國土 天人. 見此樹者. 得三法忍。一者音響忍. 二者 柔順忍. 三者無生法忍。此皆無量壽佛威神力 故.本願力故.滿足願故.明了願故.堅固願故.究 竟願故。

佛告阿難.世間帝王.有百千音樂.自轉輪聖王.乃至第六天上.伎樂音聲.展轉相勝千億萬倍。第六天上萬種樂音.不如無量壽國諸七寶樹一種音聲千億倍也。亦有自然萬種伎樂。又其

樂聲. 無非法音。清暢哀亮. 微妙和雅. 十方世 界音聲之中. 最爲第一。其講堂精舍宮殿樓觀. 皆 七寶莊嚴. 自然化成。復以眞珠. 明月. 摩尼. 衆 寶. 以爲交絡. 覆蓋其上。內外左右. 有諸浴池。 或十由旬.或二十三十.乃至百千由旬。縱廣深 淺,皆各一等。八功德水,湛然盈滿,清淨香潔,味 如甘露。黃金池者,底白銀沙。白銀池者,底黃 金沙。水精池者. 底瑠璃沙。瑠璃池者. 底水精 沙。珊瑚池者. 底琥珀沙。琥珀池者. 底珊瑚沙。 硨磲池者. 底碼碯沙。碼碯池者. 底硨磲沙。白 玉池者,底紫金沙。紫金池者,底白玉沙。或有 二寶三寶. 乃至七寶. 轉共合成。其池岸上. 有 栴檀樹, 華葉垂布, 香氣普熏。天優鉢羅華, 鉢 曇摩華. 拘牟頭華. 分陀利華. 雜色光茂. 彌覆 水上。彼諸菩薩. 及聲聞衆. 若入寶池. 意欲令 水沒足. 水卽沒足。欲令至膝. 卽至於膝。欲令 至腰. 水卽至腰。欲令至頸. 水卽至頸。欲令灌 身.自然灌身。欲令還復.水輒還復。調和冷暖.自 然隨意。開神悅體. 蕩除心垢。清明澄潔. 淨若 無形。寶沙映徹.無深不照。微瀾迴流.轉相灌 注。安詳徐逝. 不遲不疾。波揚無量自然妙聲. 隨 其所應. 莫不聞者。或聞佛聲. 或聞法聲. 或聞

僧聲. 或寂靜聲. 空無我聲. 大慈悲聲. 波羅蜜 聲. 或十力無畏不共法聲. 諸通慧聲. 無所作 聲. 不起滅聲. 無生忍聲. 乃至甘露灌頂. 衆妙 法聲。如是等聲.稱其所聞.歡喜無量。隨順清 淨離欲寂滅眞實之義. 隨順三寶力無所畏不共之 法. 隨順通慧菩薩聲聞所行之道。無有三塗苦難 之名.但有自然快樂之音。是故其國.名曰安樂。 阿難. 彼佛國土. 諸往生者. 具足如是清淨色 身. 諸妙音聲. 神通功德。所處宮殿. 衣服飲食. 衆 妙華香. 莊嚴之具. 猶第六天自然之物。若欲食 時,七寶鉢器,自然在前。金,銀,瑠璃,硨磲,碼 碯. 珊瑚. 琥珀. 明月. 真珠. 如是諸鉢. 隨意 而至。百味飲食.自然盈滿。雖有此食.實無食 者。但見色聞香. 意以爲食. 自然飽足。身心柔 輕.無所味著。事已化去.時至復現。彼佛國土.清 淨安隱. 微妙快樂. 次於無爲泥洹之道。

其諸聲聞菩薩天人.智慧高明.神通洞達.咸同一類.形無異狀。但因順餘方.故有天人之名。 顏貌端正.超世希有。容色微妙.非天非人。皆 受自然虛無之身.無極之體。佛告阿難.譬如世 間貧窮乞人.在帝王邊.形貌容狀.寧可類乎。 阿難白佛.假令此人在帝王邊.贏陋醜惡.無以

爲喻,百千萬億不可計倍。所以然者,貧窮乞 人. 底極斯下. 衣不蔽形. 食趣支命. 飢寒困苦. 人 理殆盡。皆坐前世不植德本. 積財不施. 富有益 慳. 但欲唐得. 貪求無厭。不信修善. 犯惡山積。 如是壽終. 財寶消散。苦身聚積. 爲之憂惱. 於 己無益. 徒爲他有。無善可怙. 無德可恃. 是故 死墮惡趣. 受此長苦。罪畢得出. 生爲下賤. 愚 鄙斯極. 示同人類。所以世間帝王. 人中獨尊. 皆 由宿世積德所致。慈惠博施, 仁愛兼濟, 履信修 善. 無所違爭。是以壽終福應. 得升善道。上生 天上,享茲福樂。積善餘慶,今得爲人,乃生王 家.自然尊貴。儀容端正. 衆所敬事。妙衣珍饒. 隨 心服御。宿福所追,故能致此。佛告阿難,汝言 是也。計如帝王. 雖人中尊貴. 形色端正。比之 轉輪聖王. 甚爲鄙陋. 猶彼乞人在帝王邊也。轉 輪聖王. 威相殊妙. 天下第一。比之忉利天王. 又 復醜惡. 不得相喻萬億倍也。假令天帝. 比第六 天王. 百千億倍不相類也。設第六天王. 比無量 壽佛國菩薩聲聞.光顏容色.不相及逮.百千萬 億不可計倍。

佛告阿難.無量壽國.其諸天人.衣服飲食.華香瓔珞.繒蓋幢旛.微妙音聲.所居舍宅

宮殿樓閣.稱其形色.高下大小。或一寶二寶.乃 至無量衆寶. 隨意所欲. 應念卽至。又以衆寶妙 衣. 徧布其地. 一切天人踐之而行。無量寶網. 彌 覆佛土。皆以金縷眞珠. 百千雜寶. 奇妙珍異. 莊 嚴校飾。周帀四面.垂以寶鈴。光色晃曜.盡極 嚴麗。自然德風.徐起微動。其風調和.不寒不 暑. 溫涼柔輭. 不遲不疾。吹諸羅網. 及衆寶樹. 演 發無量微妙法音. 流布萬種溫雅德香。其有聞 者. 塵勞垢習. 自然不起。風觸其身. 皆得快樂. 譬 如比丘. 得滅盡三昧。又風吹散華. 徧滿佛土。 隨色次第. 而不雜亂。柔輭光澤. 馨香芬烈。足 履其上. 蹈下四寸. 隨舉足已. 還復如故。華用 已訖. 地輒開裂. 以次化沒. 清淨無遺。隨其時 節. 風吹散華. 如是六反。又衆寶蓮華. 周滿世 界。一一寶華.百千億葉。其華光明.無量種色。 青色青光. 白色白光. 玄黃朱紫. 光色赫然。煒 燁煥爛. 明曜日月。——華中. 出三十六百千億 光。一一光中. 出三十六百千億佛. 身色紫金. 相 好殊特。——諸佛. 又放百千光明. 普爲十方說 微妙法。如是諸佛. 各各安立無量衆生於佛正道。

佛說無量壽經卷上

音釋:

佛說無量壽經卷下

曹魏康僧鎧譯

佛告阿難. 其有衆生. 生彼國者. 皆悉住於 正定之聚。所以者何,彼佛國中,無諸邪聚,及 不定聚。十方恆沙諸佛如來. 皆共讚歎無量壽佛 威神功德不可思議。諸有衆生. 聞其名號. 信心 歡喜. 乃至一念至心迴向. 願生彼國. 卽得往 牛, 住不退轉。唯除五逆, 誹謗正法。佛告阿難, 十 方世界諸天人民,其有至心願生彼國,凡有三輩。 其上輩者. 捨家棄欲而作沙門. 發菩提心. 一向 專念無量壽佛. 修諸功德. 願生彼國。此等衆 生. 臨壽終時. 無量壽佛. 與諸大衆. 現其人前。 卽隨彼佛往生其國,便於七寶華中,自然化生,住 不退轉。智慧勇猛. 神通自在。是故阿難. 其有 衆生. 欲於今世見無量壽佛. 應發無上菩提之 心,修行功德,願生彼國。佛告阿難,其中輩者,十 方世界諸天人民. 其有至心願生彼國. 雖不能行 作沙門. 大修功德。當發無上菩提之心. 一向專 念無量壽佛.多少修善.奉持齋戒.起立塔像.飯 食沙門. 懸繒然燈. 散華燒香. 以此迴向. 願生

彼國。其人臨終.無量壽佛.化現其身.光明相好.具如眞佛.與諸大衆.現其人前。卽隨化佛往生其國.住不退轉。功德智慧.次如上輩者也。佛告阿難.其下輩者.十方世界諸天人民.其有至心欲生彼國.假使不能作諸功德.當發無上菩提之心.一向專意.乃至十念.念無量壽佛.願生其國。若聞深法.歡喜信樂.不生疑惑.乃至一念.念於彼佛.以至誠心.願生其國。此人臨終.夢見彼佛.亦得往生。功德智慧.次如中輩者也。

佛告阿難.無量壽佛.威神無極。十方世界無量無邊不可思議諸佛如來.莫不稱歎。於彼東方恆河沙佛國.無量無數諸菩薩衆.皆悉往詣無量壽佛所.恭敬供養.及諸菩薩聲聞之衆.聽受經法.宣布道化。南西北方.四維上下.亦復如是。爾時世尊.而說頌曰。

東方諸佛國 其數如恆沙 彼土菩薩衆 往覲無量覺 南西北四維 上下亦復然 彼土菩薩衆 往覲無量覺 一切諸菩薩 各賣天妙華 寶香無價衣 供養無量覺

咸然奏天樂 歌歎最勝尊 究達神通慧 具足功德藏 慧日朗世間 恭敬繞三帀 見彼嚴淨土 因發無量心 應時無量尊 口出無數光 迴光圍繞身 一切天人衆 大士觀世音 白佛何緣笑 梵聲猶雷震 當授菩薩記 十方來正士 志求嚴淨土 覺了一切法 滿足諸妙願 知法如電影 具諸功德本

暢發和雅音 供養無量覺 遊入深法門 妙智無等倫 消除生死雲 稽首無上尊 微妙難思議 願我國亦然 動容發欣笑 徧照十方國 三币從頂入 踊躍皆歡喜 整服稽首問 唯然願說意 八音暢妙響 今說仁諦聽 吾悉知彼願 受決當作佛 猶如夢幻響 必成如是刹 究竟菩薩道 受決當作佛

通達諸法性 專求淨佛土 諸佛告菩薩 聞法樂受行 至彼嚴淨國 必於無量尊 其佛本願力 皆悉到彼國 菩薩興至願 普念度一切 奉事億如來 恭敬歡喜去 若人無善心 清淨有戒者 曾更見世尊 謙敬聞奉行 憍慢弊懈怠 宿世見諸佛 聲聞或菩薩 譬如從生盲 如來智慧海 二乘非所測

一切空無我 必成如是刹 **令**覲安養佛 疾得清淨處 便速得神通 受記成等覺 聞名欲往生 自致不退轉 願己國無異 名顯滿十方 飛化徧諸刹 還到安養國 不得聞此經 乃獲聞正法 則能信此事 踊躍大歡喜 難以信此法 樂聽如是教 莫能究聖心 欲行開導人 深廣無涯底 唯佛獨明了

假使一切人 具足皆得道 淨慧知本空 億劫思佛智 窮力極講說 盡壽猶不知 佛慧無邊際 如是致清淨 壽命甚難得 佛世亦難值 人有信慧難 若聞精進求 聞法能不忘 見敬得大慶 是故當發意 則我善親友 設滿世界火 必過要聞法 會當成佛道 廣度生死流

佛告阿難.彼國菩薩.皆當究竟一生補處。除其本願爲衆生故.以弘誓功德.而自莊嚴.普欲度脫一切衆生。阿難.彼佛國中諸聲聞衆.身光一尋。菩薩光明.照百由旬。有二菩薩.最尊第一.威神光明.普照三千大千世界。阿難白佛.彼二菩薩.其號云何。佛言.一名觀世音.二名大勢至。此二菩薩.於此國土.修菩薩行.命終轉化.生彼佛國。阿難.其有衆生.生彼國者.皆悉具足三十二相.智慧成滿.深入諸法.究暢要妙.神通無礙.諸根明利。其鈍根者.成就二忍。其利根者.得不可計無生法忍。又彼菩薩.乃至成佛.不受惡趣。神通自在.常識宿命。除生他

方五濁惡世.示現同彼.如我國也。佛語阿難.彼國菩薩.承佛威神.一食之頃.往詣十方無量世界.恭敬供養諸佛世尊。隨心所念華香伎樂.衣蓋幢旛.無數無量供養之具.自然化生.應念卽至。珍妙殊特.非世所有。輒以奉散諸佛.及諸菩薩聲聞之衆。在虚空中.化成華蓋.光色昱爍.香氣普熏。其華周圓四百里者.如是轉倍.乃覆三千大千世界。隨其前後.以次化沒。其諸菩薩.僉然欣悅。於虛空中.共奏天樂.以微妙音.歌歎佛德。聽受經法.歡喜無量。供養佛已.未食之前.忽然輕舉.還其本國。

佛語阿難.無量壽佛.爲諸聲聞菩薩天人.頒宣法時.都悉集會七寶講堂.廣宣道教.演暢妙法.莫不歡喜.心解得道。卽時四方自然風起.吹七寶樹.出五音聲。無量妙華.隨風四散.自然供養.如是不絕。一切諸天.皆賷天上百千華香.萬種伎樂.供養其佛.及諸菩薩聲聞之衆。普散華香.奏諸音樂。前後來往.更相開避。當斯之時.熙怡快樂.不可勝言。佛語阿難.生彼佛國諸菩薩等.所可講說.常宣正法。隨順智慧.無違無失。於其國土所有萬物.無我所心.無染著心。去來進止.情無所係。隨意自在.無所

適莫。無彼無我.無競無訟。於諸衆生.得大慈 悲饒益之心。柔潤調伏.無忿恨心。離蓋清淨.無 厭怠心。等心、勝心、深心、定心、愛法樂法喜 法之心。滅諸煩惱. 離惡趣心。究竟一切菩薩所 行. 具足成就無量功德。得深禪定. 諸通明慧。 遊志七覺. 修心佛法。肉眼清徹. 靡不分了。天 眼通達.無量無限。法眼觀察.究竟諸道。慧眼 見眞. 能度彼岸。佛眼具足覺了法性。以無礙 智.爲人演說。等觀三界.空無所有。志求佛法.具 諸辯才。除滅衆生煩惱之患。從如來生. 解法如 如。善知集滅音聲方便。不欣世語. 樂在正論。 修諸善本. 志崇佛道。知一切法. 皆悉寂滅。生 身煩惱. 二餘俱盡。聞甚深法. 心不疑懼。常能 修行其大悲者。深遠微妙. 靡不覆載。究竟一 乘.至於彼岸。決斷疑網.慧由心出。於佛教法.該 羅無外。智慧如大海. 三昧如山王。慧光明淨. 超 踰日月。清白之法. 具足圓滿。猶如雪山. 照諸 功德等一淨故。猶如大地, 淨穢好惡無異心故。 猶如淨水. 洗除塵勞諸垢染故。猶如火王. 燒滅 一切煩惱薪故。猶如大風. 行諸世界無障礙故。 猶如虛空.於一切有無所著故。猶如蓮華.於諸 世間無染汗故。猶如大乘. 運載羣萌出生死故。

猶如重雲. 震大法雷覺未覺故。猶如大雨. 雨甘 露法潤衆生故。如金剛山. 衆魔外道不能動故。 如梵天王. 於諸善法最上首故。如尼拘類樹. 普 覆一切故。如優曇鉢華. 希有難遇故。如金翅 鳥. 威伏外道故。如衆遊禽. 無所藏積故。猶如 牛王. 無能勝故。猶如象王. 善調伏故。如師子 王. 無所畏故。曠若虚空. 大慈等故。摧滅嫉心. 不 忌勝故。專樂求法.心無厭足。常欲廣說.志無 疲倦。擊法鼓. 建法幢。曜慧日. 除癡闇。修六 和敬. 常行法施。志勇精進. 心不退弱。爲世燈 明. 最勝福田。常爲師導. 等無憎愛。唯樂正道. 無 餘欣戚。拔諸欲刺,以安羣生。功慧殊勝,莫不 尊敬。滅三垢障,遊諸神通。因力,緣力,意力,願 力. 方便之力。常力. 善力. 定力. 慧力. 多聞 之力。施戒忍辱精進禪定智慧之力。正念止觀.諸 通明力。如法調伏諸衆生力。如是等力. 一切具 足。身色相好. 功德辯才. 具足莊嚴. 無與等者。 恭敬供養無量諸佛。常爲諸佛所共稱歎。究竟菩 薩諸波羅蜜. 修空無相無願三昧. 不生不滅諸三 昧門。遠離聲聞緣覺之地。阿難,彼諸菩薩,成 就如是無量功德. 我但爲汝略言之耳。若廣說 者. 百千萬劫不能窮盡。

佛告彌勒菩薩諸天人等.無量壽國.聲聞菩 薩. 功德智慧. 不可稱說。又其國土. 微妙安樂 清淨若此。何不力爲善. 念道之自然。著於無上 下. 洞達無邊際。官各勤精進. 努力自求之。必 得超絕去. 往生安樂國。橫截五惡道. 惡道自然 閉。昇道無窮極. 易往而無人。其國不逆違. 自 然之所牽。何不棄世事. 勤行求道德。可得極長 生.壽樂無有極。然世人薄俗.共静不急之事。 於此劇惡極苦之中. 勤身營務. 以自給濟。無尊 無卑.無貧無富.少長男女.共憂錢財。有無同 然, 憂思適等。屏營愁苦, 累念積慮。爲心走使, 無 有安時。有田憂田. 有宅憂宅。牛馬六畜. 奴婢 錢財. 衣食什物. 復共憂之。重思累息. 憂念愁 怖。橫爲非常水火盜賊怨家債主. 焚漂劫奪. 消 散磨滅。憂毒忪忪.無有解時。結憤心中.不離 憂惱。心堅意固. 適無縱捨。或坐摧碎. 身亡命 終.棄捐之去.莫誰隨者。尊貴豪富.亦有斯患。 憂懼萬端. 勤苦若此. 結衆寒熱. 與痛共居。貧 窮下劣. 困乏常無。無田亦憂欲有田. 無宅亦憂 欲有宅。無牛馬六畜. 奴婢錢財. 衣食什物. 亦 憂欲有之。適有一. 復少一. 有是少是. 思有齊 等。適欲具有. 便復糜散。如是憂苦. 當復求索。

不能時得.思想無益。身心俱勞.坐起不安。憂 念相隨. 勤苦若此. 亦結衆寒熱. 與痛共居。或 時坐之終身夭命. 不肯爲善. 行道進德。壽終身 死, 當獨遠去。有所趣向, 善惡之道, 莫能知者。 世間人民. 父子兄弟. 夫婦家室. 中外親屬. 當 相敬愛.無相憎嫉。有無相通.無得貪惜。言色 常和. 莫相違戾。或時心諍. 有所恚怒。今世恨 意. 微相憎嫉. 後世轉劇. 至成大怨。所以者何. 世 間之事. 更相患害。雖不卽時. 應急相破. 然含 毒畜怒. 結憤精神. 自然剋識. 不得相離。皆當 對生. 更相報復。人在世間. 愛欲之中. 獨生獨 死. 獨去獨來。當行至趣苦樂之地. 身自當之. 無 有代者。善惡變化, 殃福異處, 宿豫嚴待, 當獨 趣入。遠到他所. 莫能見者。善惡自然追行所 生. 窈窈冥冥. 別離久長。道路不同. 會見無期。 甚難甚難. 今得相值。何不棄衆事. 各遇強健 時. 努力勤修善. 精進願度世。可得極長生. 如 何不求道。安所須待, 欲何樂乎。如是世人, 不 信作善得善.爲道得道。不信人死更生.惠施得 福。善惡之事.都不信之。謂之不然.終無有是。 但坐此故,且自見之。更相瞻視,先後同然。轉 相承受. 父餘教令. 先人祖父. 素不爲善. 不識

道德。身愚神闇,心寒意閉。死生之趣,善惡之 道. 自不能見. 無有語者。吉凶禍福. 競各作之. 無 一怪也。生死常道. 轉相嗣立。或父哭子. 或子 哭父。兄弟夫婦, 更相哭泣。顚倒上下, 無常根 本. 皆當過去. 不可常保。教語開導. 信之者少。 是以生死流轉,無有休止。如此之人,蒙冥抵 突. 不信經法. 心無遠慮. 各欲快意. 癡惑愛欲。 不達於道德, 迷沒於瞋怒, 貪狼於財色, 坐之不 得道。當更惡趣苦. 生死無窮已. 哀哉甚可傷。 或時室家父子.兄弟夫婦.一死一生.更相哀愍。 恩愛思慕. 憂念結縛. 心意痛著. 迭相顧戀. 窮 日卒歲.無有解已。教語道德.心不開明。思想 恩好. 不離情欲。昏蒙闇塞. 愚惑所覆。不能深 思熟計.心自端正.專精行道.決斷世事。便旋 至竟. 年壽終盡. 不能得道. 無可奈何。總猥憒 擾.皆貪愛欲。惑道者衆.悟之者少。世間忽忽.無 可聊賴。尊卑上下. 貧富貴賤. 勤苦忽務. 各懷 殺毒。惡氣窈冥,爲妄興事。違逆天地,不從人 心。自然非惡.先隨與之.恣聽所爲.待其罪極.其 壽未終盡,便頓奪之。下入惡道,累世勤苦,展 轉其中. 數千億劫. 無有出期。痛不可言. 甚可 哀愍。

佛告彌勒菩薩. 諸天人等. 我今語汝. 世間 之事. 人用是故. 坐不得道。當熟思計. 遠離衆 惡。擇其善者. 勤而行之。愛欲榮華. 不可常保。 皆當別離,無可樂者。遇佛在世,當勤精進。其 有至願生安樂國者. 可得智慧明達. 功德殊勝。 勿得隨心所欲, 虧負經戒, 在人後也。 儻有疑 意. 不解經者. 可具問佛. 當爲說之。彌勒菩薩 長跪白言. 佛威神尊重. 所說快善。聽佛經語. 貫 心思之. 世人實爾. 如佛所言。今佛慈愍. 顯示 大道. 耳目開明. 長得度脫。聞佛所說. 莫不歡 喜。諸天人民蝡動之類、皆蒙慈恩、解脫憂苦。 佛語教戒. 甚深甚善。智慧明見八方上下去來今 事. 莫不究暢。今我衆等. 所以蒙得度脫. 皆佛 前世求道之時.謙苦所致。恩德普覆.福祿巍巍。 光明徹照, 達空無極, 開入泥洹。教授典攬, 威 制消化。感動十方,無窮無極。佛爲法王,尊超 衆聖. 普爲一切天人之師. 隨心所願. 皆令得道。 今得值佛,復聞無量壽聲,靡不歡喜,心得開明。

佛告彌勒.汝言是也。若有慈敬於佛者.實 爲大善。天下久久.乃復有佛。今我於此世作 佛.演說經法.宣布道教.斷諸疑網。拔愛欲之 本.杜衆惡之源。遊步三界.無所罣礙。典攬智

慧. 衆道之要。執持綱維. 昭然分明。開示五趣. 度 未度者. 決正生死泥洹之道。彌勒當知. 汝從無 數劫來. 修菩薩行. 欲度衆生. 其已久遠。從汝 得道. 至於泥洹. 不可稱數。汝及十方諸天人民 一切四衆.永劫已來.展轉五道.憂畏勤苦.不 可具言。乃至今世, 生死不絕, 與佛相值, 聽受 經法.又復得聞無量壽佛.快哉甚善.吾助爾喜。 汝今亦可自厭生死老病痛苦. 惡露不淨. 無可樂 者。宜自決斷. 端身正行. 益作諸善。修己潔淨. 洗 除心垢。言行忠信.表裏相應。人能自度.轉相 拯濟. 精明求願. 積累善本。雖一世勤苦. 須臾 之間。後生無量壽國. 快樂無極。長與道德合 明. 永拔生死根本。無復貪恚愚癡苦惱之患. 欲 壽一劫. 百劫. 千億萬劫. 自在隨意. 皆可得之。 無爲自然. 次於泥洹之道。汝等宜各精進. 求心 所願。無得疑惑中悔. 自爲過咎. 生彼邊地七寶 宮殿. 五百歲中受諸戹也。彌勒白言. 受佛重 誨. 專精修學. 如教奉行. 不敢有疑。

佛告彌勒.汝等能於此世.端心正意.不作 衆惡.甚爲至德。十方世界.最無倫匹。所以者 何.諸佛國土.天人之類.自然作善.不大爲惡.易 可開化。今我於此世間作佛.處於五惡五痛五燒

之中. 爲最劇苦. 教化羣生. 令捨五惡. 令去五 痛. 令離五燒. 降化其意. 令持五善. 獲其福德 度世長壽泥洹之道。佛言. 何等五惡. 何等五 痛,何等五燒,何等消化五惡,令持五善,獲其 福德度世長壽泥洹之道。其一惡者. 諸天人民蝡 動之類. 欲爲衆惡. 莫不皆然。强者伏弱. 轉相 剋賊。殘害殺戮, 迭相吞噬。不知修善, 惡逆無 道。後受殃罰. 自然趣向。神明記識. 犯者不赦。 故有貧窮下賤. 乞丐孤獨. 聾盲瘖症. 愚癡弊 惡. 至有尫狂不逮之屬。又有尊貴豪富. 高才明 達. 皆由宿世慈孝. 修善積德所致。世有常道. 王 法牢獄. 不肯畏慎. 爲惡入罪. 受其殃罰. 求望 解脫. 難得勉出。世間有此目前現事. 壽終後 世. 尤深尤劇。入其幽冥. 轉生受身。譬如王法. 痛 苦極刑。故有自然三塗.無量苦惱。轉貿其身.改 形易道。所受壽命. 或長或短。魂神精識. 自然 趣之。當獨值向. 相從共生。更相報復. 無有止 已。殃惡未盡.不得相離。展轉其中.無有出期.難 得解脫. 痛不可言。天地之間. 自然有是. 雖不 卽時卒暴應至. 善惡之道. 會當歸之。是爲一大 惡一痛一燒. 勤苦如是。譬如大火焚燒人身. 人 能於中一心制意. 端身正行. 獨作諸善. 不爲衆 惡者.身獨度脫.獲其福德度世上天泥洹之道.是爲一大善也。

佛言. 其二惡者. 世間人民. 父子兄弟. 室 家夫婦. 都無義理. 不順法度。奢淫憍縱. 各欲 快意。任心自恣. 更相欺惑。心口各異. 言念無 實。佞諂不忠. 巧言諛媚。嫉賢謗善. 陷入怨枉。 主上不明. 任用臣下。臣下自在. 機僞多端。踐 度能行. 知其形勢。在位不正. 爲其所欺。妄損 忠良. 不當天心。臣欺其君. 子欺其父。兄弟夫 婦. 中外知識. 更相欺誑。各懷貪欲瞋恚愚癡。 欲自厚己. 欲貪多有。尊卑上下. 心俱同然。破 家亡身. 不顧前後。親屬內外. 坐之滅族。或時 室家知識. 鄉黨市里. 愚民野人. 轉共從事。更 相利害. 忿成怨結。富有慳惜. 不肯施與。愛保 貪重. 心勞身苦。如是至竟. 無所恃怙。獨來獨 去.無一隨者。善惡禍福.追命所生。或在樂處.或 入苦毒, 然後乃悔, 當復何及。世間人民, 心愚 少智。見善憎謗. 不思慕及。但欲爲惡. 妄作非 法。常懷盜心. 悕望他利。消散磨盡. 而復求索。 邪心不正. 懼人有色。不豫思計. 事至乃悔。今 世現有王法牢獄. 隨罪趣向. 受其殃罰。因其前 世不信道德.不修善本。今復爲惡.天神剋識.別

其名籍。壽終神逝.下入惡道。故有自然三塗.無量苦惱。展轉其中.世世累劫.無有出期.難得解脫.痛不可言。是爲二大惡二痛二燒.勤苦如是。譬如大火焚燒人身.人能於中一心制意.端身正行.獨作諸善.不爲衆惡者.身獨度脫.獲其福德度世上天泥洹之道.是爲二大善也。

佛言. 其三惡者. 世間人民. 相因寄生. 共 居天地之間。處年壽命,無能幾何。上有賢明長 者尊貴豪富. 下有貧窮廝賤尫劣愚夫. 中有不善 之人. 常懷邪惡。但念淫泆. 煩滿胸中。愛欲交 亂. 坐起不安。貪意守惜. 但欲唐得。眄睞細色. 邪 態外逸。自妻厭憎. 私妄出入。費損家財. 事爲 非法。交結聚會. 興師相伐。攻劫殺戮. 强奪無 道。惡心在外.不自修業。盜竊趣得.欲擊成事。 恐勢迫脅. 歸給妻子。恣心快意. 極身作樂。或 於親屬. 不避尊卑。家室中外. 患而苦之。亦復 不畏王法禁令。如是之惡. 著於人鬼。日月照 見, 神明記識。故有自然三途, 無量苦惱。展轉 其中,世世累劫,無有出期,難得解脫,痛不可 言。是爲三大惡三痛三燒, 勤苦如是。譬如大火 焚燒人身. 人能於中一心制意. 端身正行. 獨作 諸善. 不爲衆惡者. 身獨度脫. 獲其福德度世上

天泥洹之道. 是爲三大善也。

佛言. 其四惡者. 世間人民. 不念修善。轉 相教令, 共爲衆惡。兩舌惡口, 妄言綺語。讓賊 關圖... 憎嫉善人。敗壞賢明... 於傍快喜。不孝二 親.輕慢師長。朋友無信.難得誠實。尊貴自大.謂 己有道。橫行威勢. 侵易於人。不能自知. 爲惡 無恥。自以强健, 欲人敬難。不畏天地神明日 月. 不肯作善. 難可降化。自用偃蹇. 謂可常爾。 無所憂懼. 常懷憍慢。如是衆惡. 天神記識。賴 其前世頗作福德. 小善扶接. 營護助之。今世爲 惡,福德盡滅。諸善鬼神,各去離之。身獨空立,無 所復依。壽命終盡. 諸惡所歸。自然迫促. 共趣 奪之。又其名籍. 記在神明。殃咎牽引. 當往趣 向。罪報自然.無從捨離。但得前行.入於火鑊。 身心摧碎.精神痛苦。當斯之時.悔復何及。天 道冏然. 不得蹉跌。故有自然三塗. 無量苦惱。 展轉其中. 世世累劫. 無有出期. 難得解脫. 痛 不可言。是爲四大惡四痛四燒,勤苦如是。譬如 大火焚燒人身.人能於中一心制意.端身正行.獨 作諸善. 不爲衆惡. 身獨度脫. 獲其福德度世上 天泥洹之道. 是爲四大善也。

佛言. 其五惡者. 世間人民. 徙倚懈惰. 不

肯作善、治身修業。家室眷屬、飢寒困苦。父母 教誨. 瞋目怒應。言令不和. 違戾反逆。譬如怨 家.不如無子。取與無節.衆共患厭。負恩違義.無 有報償之心。貧窮困乏. 不能復得。辜較縱奪. 放 恣遊散。串數唐得. 用自賑給。耽酒嗜美. 飲食 無度。肆心蕩逸. 魯扈抵突。不識人情. 强欲抑 制。見人有善. 妬嫉惡之。無義無禮. 無所顧難。 自用識當.不可諫曉。六親眷屬.所資有無.不 能憂念。不惟父母之恩. 不存師友之義。心常念 惡. 口常言惡. 身常行惡. 曾無一善。不信先聖 諸佛經法,不信行道可得度世,不信死後神明更 生。不信作善得善. 爲惡得惡。欲殺眞人. 鬪亂 衆僧。欲害父母兄弟眷屬。六親憎惡. 願令其死。 如是世人. 心意俱然。愚癡蒙昧. 而自以智慧。 不知生所從來.死所趣向。不仁不順.惡逆天地。 而於其中. 烯望僥倖。欲求長生. 會當歸死。慈 心教誨. 令其念善。開示生死善惡之趣. 自然有 是. 而不肯信之。苦心與語. 無益其人。心中閉 塞. 意不開解。大命將終. 悔懼交至。不豫修善. 臨 窮方悔. 悔之於後. 將何及乎。天地之間. 五道 分明。恢廓窈冥. 浩浩茫茫。善惡報應. 禍福相 承。身自當之.無誰代者。數之自然.應期所行。

殃咎追命.無得從捨。善人行善.從樂入樂.從明入明。惡人行惡.從苦入苦.從冥入冥。誰能知者.獨佛知耳。教語開示.信用者少。生死不休.惡道不絕。如是世人.難可具盡。故有自然三塗.無量苦惱。展轉其中.世世累劫.無有出期.難得解脫.痛不可言。是爲五大惡五痛五燒.勤苦如是。譬如大火焚燒人身.人能於中一心制意.端身正念.言行相副.所作至誠.所語如語.心口不轉.獨作諸善.不爲衆惡.身獨度脫.獲其福德度世上天泥洹之道.是爲五大善也。

佛告彌勒. 吾語汝等. 是世五惡. 勤苦若此。五痛五燒. 展轉相生。但作衆惡. 不修善本. 皆悉自然入諸惡趣。或其今世先被殃病. 求死不得. 求生不得. 罪惡所招. 示衆見之。身死隨行. 入三惡道。苦毒無量. 自相燋然。至其久後. 共作怨結。從小微起. 遂成大惡。皆由貪著財色. 不能施惠。癡欲所迫. 隨心思想。煩惱結縛. 無有解已。厚己諍利. 無所省錄。富貴榮華. 當時快意。不能忍辱. 不務修善。威勢無幾. 隨以磨滅。身坐勞苦. 久後大劇。天道弛張. 自然糺舉。綱維羅網. 上下相應。榮榮忪忪. 當入其中。古今有是. 痛哉可傷。佛語彌勒. 世間如是. 佛皆哀

之。以威神力.摧滅衆惡.悉令就善。棄捐所思.奉 持經戒。受行道法. 無所違失。終得度世泥洹之 道。佛言.汝今諸天人民.及後世人.得佛經語.當 熟思之。能於其中端心正行。主上爲善. 率化其 下。轉相勅令.各自端守。尊聖敬善.仁慈博愛。 佛語教誨.無敢虧負。當求度世.拔斷生死衆惡 之本。當離三塗無量憂怖苦痛之道。汝等於是廣 植德本. 布恩施惠. 勿犯道禁。忍辱精進. 一心 智慧。轉相教化.爲德立善。正心正意.齋戒清 淨一日一夜. 勝在無量壽國爲善百歲。所以者 何. 彼佛國土. 無爲自然. 皆積衆善. 無毛髮之 惡。於此修善十日十夜. 勝於他方諸佛國中爲善 千歲。所以者何. 他方佛國. 爲善者多. 爲惡者 少. 福德自然. 無造惡之地。唯此間多惡. 無有 自然。勤苦求欲、轉相欺殆。心勞形困、飲苦食 毒。如是惡務.未嘗寧息。吾哀汝等天人之類.苦 心誨喻. 教令修善。隨宜開導. 授與經法. 莫不 承用。在意所願, 皆令得道。佛所遊履國邑丘 聚.靡不蒙化。天下和順.日月清明。風雨以時.災 厲不起。國豐民安,兵戈無用。崇德興仁,務修 禮讓。佛言. 我哀愍汝等諸天人民. 甚於父母念 子。今我於此世作佛,降化五惡,消除五痛,絕 滅五燒。以善攻惡. 拔生死之苦。令獲五德. 升無爲之安。吾去世後. 經道漸滅. 人民諂僞. 復爲衆惡。五燒五痛. 還如前法。久後轉劇. 不可悉說。我但爲汝略言之耳。佛語彌勒. 汝等各善思之. 轉相教誡. 如佛經法. 無得犯也。於是彌勒菩薩. 合掌白言. 佛所說甚善. 世人實爾。如來普慈哀愍. 悉令度脫。受佛重誨. 不敢違失。

佛告阿難. 汝起. 更整衣服. 合掌恭敬. 禮 無量壽佛。十方國土諸佛如來. 常共稱揚讚歎彼 佛.無著無礙。於是阿難起整衣服.正身西面.恭 敬合掌, 五體投地, 禮無量壽佛。白言, 世尊, 願 見彼佛安樂國土.及諸菩薩聲聞大衆。說是語 已. 卽時無量壽佛. 放大光明. 普照一切諸佛世 界。金剛圍山.須彌山王.大小諸山.一切所有.皆 同一色。譬如劫水彌滿世界.其中萬物沈沒不現。 滉瀁浩汗. 唯見大水。彼佛光明. 亦復如是。聲 聞菩薩一切光明. 皆悉隱蔽. 唯見佛光. 明耀顯 赫。爾時阿難, 卽見無量壽佛, 威德巍巍, 如須 彌山王. 高出一切諸世界上。相好光明. 靡不照 耀。此會四衆,一時悉見。彼見此土,亦復如是。 爾時佛告阿難. 及慈氏菩薩. 汝見彼國. 從地已 上,至淨居天,其中所有微妙嚴淨自然之物,爲

悉見不。阿難對曰.唯然.已見。汝寧復聞無量壽佛大音宣布一切世界化衆生不。阿難對曰.唯然.已聞。彼國人民.乘百千由旬七寶宮殿.無所障礙.徧至十方供養諸佛.汝復見不。對曰.已見。彼國人民.有胎生者.汝復見不。對曰.已見。其胎生者.所處宮殿.或百由旬.或五百由旬。各於其中受諸快樂.如忉利天上.亦皆自然。

爾時慈氏菩薩白佛言. 世尊. 何因何緣. 彼 國人民. 胎生化生。佛告慈氏. 若有衆生. 以疑 惑心. 修諸功德. 願生彼國。不了佛智. 不思議 智. 不可稱智. 大乘廣智. 無等無倫最上勝智。 於此諸智. 疑惑不信。然猶信罪福. 修習善本. 願 生其國。此諸衆生、生彼宮殿、壽五百歲、常不 見佛. 不聞經法. 不見菩薩聲聞聖衆. 是故於彼 國土. 謂之胎生。若有衆生. 明信佛智. 乃至勝 智. 作諸功德. 信心迴向。此諸衆生. 於七寶華 中.自然化生.跏趺而坐。須臾之頃.身相光明.智 慧功德,如諸菩薩具足成就。復次慈氏,他方諸 大菩薩. 發心欲見無量壽佛. 恭敬供養. 及諸菩 薩聲聞聖衆。彼菩薩等. 命終得生無量壽國. 於 七寶華中. 自然化生。彌勒當知. 彼化生者. 智 慧勝故。其胎生者、皆無智慧、於五百歲中、常 不見佛. 不聞經法. 不見菩薩諸聲聞衆。無由供 養於佛. 不知菩薩法式. 不得修習功德。當知此 人. 宿世之時. 無有智慧. 疑惑所致。佛告彌勒. 譬 如轉輪聖王. 有七寶牢獄. 種種莊嚴. 張設牀 帳. 懸諸繒蓋。若有諸小王子. 得罪於王. 輒內 彼獄中. 繋以金鎖。供養飯食衣服牀蓐. 華香伎 樂. 如轉輪王. 無所乏少。於意云何. 此諸王子. 寧 樂彼處不。對曰.不也。但種種方便.求諸大力.欲 自勉出。佛告彌勒.此諸衆生.亦復如是。以疑 惑佛智故. 生彼七寶宮殿. 無有刑罰. 乃至一念 惡事。但於五百歲中,不見三寶,不得供養修諸 以此爲苦。雖有餘樂. 猶不樂彼處。若此 衆生. 識其本罪. 深自悔責. 求離彼處. 卽得如 意. 往詣無量壽佛所. 恭敬供養. 亦得徧至無量 無數諸餘佛所. 修諸功德。彌勒當知. 其有菩 薩. 生疑惑者. 爲失大利。是故應當明信諸佛無 上智慧。

彌勒菩薩白佛言.世尊.於此世界.有幾所不退菩薩.生彼佛國。佛告彌勒.於此世界.六十七億不退菩薩.往生彼國。一一菩薩.已曾供養無數諸佛.次如彌勒者也。諸小行菩薩.及修習少功德者.不可稱計.皆當往生。佛告彌勒.不

但我剎諸菩薩等, 往生彼國。他方佛土, 亦復如 是。其第一佛. 名曰遠照. 彼有百八十億菩薩. 皆 當往生。其第二佛. 名曰寶藏. 彼有九十億菩 薩. 皆當往生。其第三佛. 名曰無量音. 彼有二 百二十億菩薩. 皆當往生。其第四佛. 名曰甘露 彼有二百五十億菩薩. 皆當往生。其第五 佛. 名曰龍勝. 彼有十四億菩薩. 皆當往生。其 第六佛. 名曰勝力. 彼有萬四千菩薩. 皆當往生。 其第七佛. 名曰師子. 彼有五百菩薩. 皆當往生。 其第八佛. 名曰離垢光. 彼有八十億菩薩. 皆當 往生。其第九佛,名曰德首,彼有六十億菩薩,皆 當往生。其第十佛. 名曰妙德山. 彼有六十億菩 薩. 皆當往生。其第十一佛. 名曰人王. 彼有十 億菩薩. 皆當往生。其第十二佛. 名曰無上華. 彼 有無數不可稱計諸菩薩衆. 皆不退轉. 智慧勇 猛. 已曾供養無量諸佛。於七日中. 卽能攝取百 千億劫大士所修堅固之法。斯等菩薩. 皆當往生。 其第十三佛. 名曰無畏. 彼有七百九十億大菩薩 衆.諸小菩薩.及比丘等.不可稱計.皆當往生。 佛語彌勒. 不但此十四佛國中諸菩薩等. 當往生 也。十方世界無量佛國.其往生者.亦復如是.甚 多無數。我但說十方諸佛名號.及菩薩比丘生彼

國者. 晝夜一劫. 尚未能盡。我今爲汝略說之耳。

佛告彌勒.其有得聞彼佛名號.歡喜踊躍.乃 至一念.當知此人爲得大利.則是具足無上功德。 是故彌勒. 設有大火. 充滿三千大千世界. 要當 過此. 聞是經法. 歡喜信樂. 受持讀誦. 如說修 行。所以者何. 多有菩薩. 欲聞此經. 而不能得。 若有衆生. 聞此經者. 於無上道. 終不退轉。是 故應當專心信受. 持誦說行。吾今爲諸衆生. 說 此經法. 令見無量壽佛. 及其國土一切所有。所 當爲者. 皆可求之。無得以我滅度之後. 復生疑 惑。當來之世,經道滅盡,我以慈悲哀愍,特留 此經. 止住百歲。其有衆生. 值斯經者. 隨意所 願. 皆可得度。佛語彌勒. 如來興世. 難值難見。 諸佛經道. 難得難聞。菩薩勝法. 諸波羅蜜. 得 聞亦難。遇善知識. 聞法能行. 此亦爲難。若聞 斯經. 信樂受持. 難中之難. 無過此難。是故我 法. 如是作. 如是說. 如是教。應當信順. 如法 修行。

爾時世尊.說此經法.無量衆生.皆發無上正覺之心。萬二千那由他人.得清淨法眼。二十二億諸天人民.得阿那含果。八十萬比丘.漏盡意解。四十億菩薩.得不退轉。以弘誓功德而自

莊嚴。於將來世.當成正覺。爾時三千大千世界 六種震動.大光普照十方國土。百千音樂.自然 而作。無量妙華.芬芬而降。佛說經已.彌勒菩薩.及十方來諸菩薩衆.長老阿難.諸大聲聞.一切大衆.靡不歡喜。

佛說無量壽經卷下

音釋:

兩切滉養水貌

大佛頂首楞嚴經大勢至 菩薩念佛圓通章

唐天竺沙門般剌密諦譯

大勢至法王子. 與其同倫五十二菩薩. 卽從 座起. 頂禮佛足. 而白佛言。我憶往昔恆河沙 劫,有佛出世,名無量光。十二如來,相繼一劫。 其最後佛. 名超日月光。彼佛教我念佛三昧。譬 如有人. 一專爲憶. 一人專忘. 如是二人. 若逢 不逢. 或見非見。二人相憶. 二憶念深. 如是乃 至從生至生. 同於形影. 不相乖異。十方如來. 憐 念衆生. 如母憶子。若子逃逝. 雖憶何爲。子若 憶母. 如母憶時. 母子歷生. 不相違遠。若衆生 心, 憶佛念佛, 現前當來, 必定見佛, 去佛不遠。 不假方便, 自得心開。如染香人, 身有香氣, 此 則名曰香光莊嚴。我本因地,以念佛心,入無生 忍。今於此界.攝念佛人.歸於淨土。佛問圓通.我 無選擇。都攝六根.淨念相繼.得三摩地.斯爲 第一。

大佛頂首楞嚴經大勢至菩薩念佛圓通章

大方廣佛華嚴經普賢 菩薩行願品

唐罽賓國三藏般若奉詔譯

爾時普賢菩薩摩訶薩.稱歎如來勝功德已.告諸菩薩.及善財言。善男子.如來功德.假使十方一切諸佛.經不可說不可說佛刹極微塵數劫.相續演說.不可窮盡。若欲成就此功德門.應修十種廣大行願。何等爲十.一者禮敬諸佛.二者稱讚如來.三者廣修供養.四者懺悔業障.五者隨喜功德.六者請轉法輪.七者請佛住世.八者常隨佛學.九者恆順衆生.十者普皆迴向。善財白言.大聖.云何禮敬.乃至迴向。

普賢菩薩告善財言. 善男子. 言禮敬諸佛者. 所有盡法界虛空界. 十方三世一切佛刹極微塵數諸佛世尊. 我以普賢行願力故. 深心信解. 如對目前. 悉以清淨身語意業. 常修禮敬。一一佛所. 皆現不可說不可說佛刹極微塵數身。一一身. 徧禮不可說不可說佛刹極微塵數佛。虛空界盡. 我禮乃盡。以虛空界不可盡故. 我此禮敬無有窮盡。如是乃至衆生界盡. 衆生業盡. 衆生煩

惱盡.我禮乃盡。而衆生界乃至煩惱無有盡故.我 此禮敬無有窮盡。念念相續.無有閒斷。身語意 業.無有疲厭。

復次善男子.言稱讚如來者.所有盡法界虛空界.十方三世一切刹土.所有極微一一塵中.皆有一切世間極微塵數佛。一一佛所.皆有菩薩海會圍繞。我當悉以甚深勝解現前知見.各以出過辯才天女微妙舌根.一一舌根.出無盡音聲海。一一音聲.出一切言辭海。稱揚讚歎一切如來諸功德海。窮未來際.相續不斷。盡於法界.無不周徧。如是虛空界盡.衆生界盡.衆生業盡.衆生煩惱盡.我讚乃盡。而虛空界乃至煩惱無有盡故.我此讚歎無有窮盡。念念相續.無有閒斷。身語意業.無有疲厭。

復次善男子.言廣修供養者.所有盡法界虚空界.十方三世一切佛刹極微塵中.一一各有一切世界極微塵數佛。一一佛所.種種菩薩海會圍繞。我以普賢行願力故.起深信解現前知見.悉以上妙諸供養具.而爲供養。所謂華雲鬘雲.天音樂雲.天傘蓋雲.天衣服雲.天種種香.塗香燒香末香.如是等雲.一一量如須彌山王。然種種燈.酥燈油燈.諸香油燈.一一燈炷如須彌

山. 一一燈油如大海水。以如是等諸供養具. 常 爲供養。善男子. 諸供養中. 法供養最。所謂如 說修行供養. 利益衆生供養. 攝受衆生供養. 代 衆生苦供養,勤修善根供養,不捨菩薩業供養,不 離菩提心供養。善男子,如前供養無量功德,比 法供養一念功德. 百分不及一. 千分不及一. 百 千俱胝那由他分. 迦羅分. 算分. 數分. 喻分. 優 波尼沙陀分,亦不及一。何以故,以諸如來尊重 法故。以如說行. 出生諸佛故。若諸菩薩行法供 養.則得成就供養如來。如是修行.是眞供養故。 此廣大最勝供養, 虚空界盡, 衆生界盡, 衆生業 盡. 衆生煩惱盡. 我供乃盡。而虛空界乃至煩惱 不可盡故,我此供養亦無有盡。念念相續,無有 閒斷。身語意業. 無有疲厭。

復次善男子.言懺悔業障者.菩薩自念.我 於過去無始劫中.由貪瞋癡.發身口意.作諸惡 業.無量無邊。若此惡業有體相者.盡虚空界不 能容受。我今悉以清淨三業.徧於法界極微塵 刹.一切諸佛菩薩衆前.誠心懺悔.後不復造.恆 住淨戒一切功德。如是虛空界盡.衆生界盡.衆 生業盡.衆生煩惱盡.我懺乃盡。而虛空界乃至 衆生煩惱不可盡故.我此懺悔無有窮盡。念念相 續. 無有閒斷。身語意業. 無有疲厭。

復次善男子. 言隨喜功德者. 所有盡法界虛 空界,十方三世一切佛刹,極微塵數諸佛如來。 從初發心,爲一切智,勤修福聚,不惜身命,經 不可說不可說佛剎極微塵數劫。——劫中. 捨不 可說不可說佛刹極微塵數頭目手足。如是一切難 行苦行. 圓滿種種波羅蜜門. 證入種種菩薩智 地.成就諸佛無上菩提.及般涅槃.分布舍利.所 有善根. 我皆隨喜。及彼十方一切世界. 六趣四 生一切種類,所有功德,乃至一塵,我皆隨喜。 十方三世一切聲聞,及辟支佛,有學無學,所有 功德. 我皆隨喜。一切菩薩所修無量難行苦行. 志 求無上正等菩提,廣大功德,我皆隨喜。如是虛 空界盡. 衆生界盡. 衆生業盡. 衆生煩惱盡. 我 此隨喜無有窮盡。念念相續,無有閒斷。身語意 業. 無有疲厭。

復次善男子.言請轉法輪者.所有盡法界虚空界.十方三世一切佛刹極微塵中.一一各有不可說不可說佛刹極微塵數廣大佛刹。一一刹中.念念有不可說不可說佛刹極微塵數一切諸佛成等正覺.一切菩薩海會圍繞。而我悉以身口意業種種方便.殷勤勸請轉妙法輪。如是虛空界

盡. 衆生界盡. 衆生業盡. 衆生煩惱盡. 我常勸請一切諸佛轉正法輪. 無有窮盡。念念相續. 無有閒斷。身語意業. 無有疲厭。

復次善男子.言請佛住世者.所有盡法界虚空界.十方三世一切佛刹.極微塵數諸佛如來.將欲示現般涅槃者。及諸菩薩聲聞緣覺有學無學.乃至一切諸善知識.我悉勸請莫入涅槃。經於一切佛刹極微塵數劫.爲欲利樂一切衆生。如是虚空界盡.衆生界盡.衆生業盡.衆生煩惱盡.我此勸請無有窮盡。念念相續.無有閒斷。身語意業.無有疲厭。

復次善男子.言常隨佛學者.如此娑婆世界 毗盧遮那如來.從初發心.精進不退.以不可說 不可說身命而爲布施。剝皮爲紙.析骨爲筆.刺血爲墨.書寫經典.積如須彌。爲重法故.不惜 身命.何况王位.城邑聚落.宫殿園林.一切所 有.及餘種種難行苦行。乃至樹下成大菩提.示種種神通.起種種變化.現種種佛身.處種種衆會.或處一切諸大菩薩衆會道場.或處聲聞及辟 支佛衆會道場.或處轉輪聖王小王眷屬衆會道場.或處刹利及婆羅門長者居士衆會道場.乃至或處天龍八部人非人等衆會道場。處於如是種種

衆會. 以圓滿音. 如大雷震. 隨其樂欲. 成熟衆生. 乃至示現入於涅槃. 如是一切我皆隨學。如今世尊. 毗盧遮那如是. 盡法界虛空界. 十方三世一切佛刹. 所有塵中一切如來. 皆亦如是. 於念令中. 我皆隨學。如是虛空界盡. 衆生界盡. 衆生果盡. 衆生類盡. 衆生類

復次善男子. 言恆順衆生者. 謂盡法界虛空 界. 十方刹海所有衆生. 種種差別。所謂卵生胎 生溼生化生.或有依於地水火風而生住者.或有 依空及諸卉木而生住者,種種生類,種種色身,種 種形狀. 種種相貌. 種種壽量. 種種族類. 種種 名號, 種種心性, 種種知見, 種種欲樂, 種種意 行. 種種威儀. 種種衣服. 種種飲食. 處於種種 村營聚落城邑宮殿。乃至一切天龍八部人非人等。 無足二足四足多足. 有色無色. 有想無想. 非有 想非無想. 如是等類. 我皆於彼隨順而轉。種種 承事. 種種供養。如敬父母. 如奉師長. 及阿羅 漢. 乃至如來. 等無有異。於諸病苦. 爲作良醫。 於失道者. 示其正路。於闇夜中. 爲作光明。於 貧窮者.令得伏藏。菩薩如是平等饒益一切衆生。 何以故. 菩薩若能隨順衆生. 則爲隨順供養諸佛。

若於衆生尊重承事. 則爲尊重承事如來。若令衆 生生歡喜者. 則令一切如來歡喜。何以故. 諸佛 如來,以大悲心而爲體故。因於衆生而起大悲,因 於大悲生菩提心, 因菩提心成等正覺。譬如曠野 沙磧之中, 有大樹王, 若根得水, 枝葉華果, 悉 皆繁茂。生死曠野. 菩提樹王. 亦復如是。一切 衆生而爲樹根. 諸佛菩薩而爲華果。以大悲水饒 益衆生.則能成就諸佛菩薩智慧華果。何以故.若 諸菩薩以大悲水饒益衆生.則能成就阿耨多羅三 藐三菩提故。是故菩提.屬於衆生。若無衆生.一 切菩薩終不能成無上正覺。善男子,汝於此義,應 如是解。以於衆生心平等故.則能成就圓滿大悲。 以大悲心隨衆生故. 則能成就供養如來。菩薩如 是隨順衆生. 虚空界盡. 衆生界盡. 衆生業盡. 衆 生煩惱盡.我此隨順無有窮盡。念念相續.無有 閒斷。身語意業. 無有疲厭。

復次善男子.言普皆迴向者.從初禮拜.乃至隨順.所有功德.皆悉迴向盡法界虛空界一切衆生。願令衆生常得安樂.無諸病苦。欲行惡法.皆悉不成。所修善業.皆速成就。關閉一切諸惡趣門.開示人天涅槃正路。若諸衆生.因其積集諸惡業故.所感一切極重苦果.我皆代受。

令彼衆生.悉得解脫.究竟成就無上菩提。菩薩如是所修迴向.虚空界盡.衆生界盡.衆生業盡.衆生煩惱盡.我此迴向無有窮盡。念念相續.無有閒斷。身語意業.無有疲厭。

善男子. 是爲菩薩摩訶薩十種大願. 具足圓 滿。若諸菩薩於此大願. 隨順趣入. 則能成熟一 切衆生. 則能隨順阿耨多羅三藐三菩提. 則能成 滿普賢菩薩諸行願海。是故善男子.汝於此義.應 如是知。若有善男子善女人. 以滿十方無量無邊 不可說不可說佛剎極微塵數一切世界上妙七 寶. 及諸人天最勝安樂. 布施爾所一切世界所有 衆生. 供養爾所一切世界諸佛菩薩. 經爾所佛刹 極微塵數劫. 相續不斷. 所得功德。若復有人. 聞 此願王. 一經於耳. 所有功德. 比前功德. 百分 不及一, 千分不及一, 乃至優波尼沙陀分亦不及 一。或復有人. 以深信心. 於此大願受持讀誦. 乃 至書寫一四句偈. 速能除滅五無閒業。所有世間 身心等病, 種種苦惱, 乃至佛剎極微塵數一切惡 業.皆得消除。一切魔軍.夜叉羅刹.若鳩槃茶.若 毗舍閣, 若部多等, 飲血啗肉, 諸惡鬼神, 皆悉 遠離。或時發心親近守護。是故若人誦此願者.行 於世間.無有障礙。如空中月.出於雲翳。諸佛

菩薩之所稱讚.一切人天皆應禮敬.一切衆生悉 應供養。此善男子. 善得人身. 圓滿普賢所有功 德。不久當如普賢菩薩,速得成就微妙色身,具 三十二大丈夫相。若生人天, 所在之處, 常居勝 族。悉能破壞一切惡趣,悉能遠離一切惡友,悉 能制伏一切外道. 悉能解脫一切煩惱。如師子 王. 摧伏羣獸。堪受一切衆生供養。又復是人臨 命終時. 最後刹那. 一切諸根悉皆散壞. 一切親 屬悉皆捨離.一切威勢悉皆退失。輔相大臣. 宮 城內外. 象馬車乘. 珍寶伏藏. 如是一切無復相 隨。唯此願王,不相捨離,於一切時,引導其前。 一刹那中. 卽得往生極樂世界。到已. 卽見阿彌 陀佛. 文殊師利菩薩. 普賢菩薩. 觀自在菩薩. 彌 勒菩薩等。此諸菩薩. 色相端嚴. 功德具足. 所 共圍繞。其人自見生蓮華中. 蒙佛授記。得授記 已. 經於無數百千萬億那由他劫. 普於十方不可 說不可說世界,以智慧力,隨衆生心而爲利益。 不久當坐菩提道場,降伏魔軍,成等正覺,轉妙 法輪。能令佛剎極微塵數世界衆生. 發菩提心。 隨其根性, 教化成熟, 乃至盡於未來劫海, 廣能 利益一切衆生。善男子. 彼諸衆生. 若聞若信此 大願王. 受持讀誦. 廣爲人說。所有功德. 除佛 世尊.餘無知者。是故汝等聞此願王.莫生疑念.應當諦受。受已能讀.讀已能誦.誦已能持.乃至書寫.廣爲人說。是諸人等.於一念中.所有行願.皆得成就。所獲福聚.無量無邊。能於煩惱大苦海中.拔濟衆生.令其出離.皆得往生阿彌陀佛極樂世界。爾時普賢菩薩摩訶薩.欲重宣此義.普觀十方而說偈言。

所有十方世界中 我以清淨身語意 普賢行願威神力 一身復現刹塵身 於一塵中塵數佛 無盡法界塵亦然 各以一切音聲海 盡於未來一切劫 以諸最勝妙華鬘 如是最勝莊嚴具 最勝衣服最勝香 -一皆如妙高聚 我以廣大勝解心 悉以普賢行願力 我昔所造諸惡業

三世一切人師子 一切徧禮盡無餘 普現一切如來前 —— 編禮 糾 塵佛 各處菩薩衆會中 深信諸佛皆充滿 普出無盡妙言辭 讚佛甚深功德海 伎樂塗香及傘蓋 我以供養諸如來 末香燒香與燈燭 我悉供養諸如來 深信一切三世佛 普徧供養諸如來 皆由無始貪瞋癡 從身語意之所生 十方一切諸衆生 一切如來與菩薩 十方所有世間燈 我今一切皆勸請 諸佛若欲示涅槃 唯願久住刹塵劫 所有禮讚供養福 隨喜懺悔諸善根 我隋一切如來學 供養過去諸如來 未來一切天人師 我願普隨三世學 所有十方一切刹 衆會圍繞諸如來 十方所有諸衆生 獲得甚深正法利 我爲菩提修行時 常得出家修淨戒 天龍夜叉鳩槃茶 所有一切衆生語 勤修清淨波羅蜜

一切我今皆懺悔 二乘有學及無學 所有功德皆隨喜 最初成就菩提者 轉於無上妙法輪 我悉至誠而勸請 利樂一切諸衆生 請佛住世轉法輪 迴向衆生及佛道 修習普賢圓滿行 及與現在十方佛 一切意樂皆圓滿 速得成就大菩提 廣大清淨妙莊嚴 悉在菩提樹王下 願離憂患常安樂 滅除煩惱盡無餘 一切趣中成宿命 無垢無破無穿漏 乃至人與非人等 悉以諸音而說法 恆不忘失菩提心

滅除障垢無有餘 於諸惑業及魔境 猶如蓮華不著水 悉除一切惡道苦 如是經於剎塵劫 我常隨順諸衆生 恆修普賢廣大行 所有與我同行者 身口意業皆同等 所有益我善知識 常願與我同集會 願常面見諸如來 於彼皆興廣大供 願持諸佛微妙法 究竟清淨普賢道 我於一切諸有中 定慧方便及解脫 一塵中有塵數刹 -一佛處衆會中 普盡十方諸刹海 佛海及與國土海 一切如來語清淨

一切妙行皆成就 世間道中得解脫 亦如日月不住空 等與一切羣生樂 十方利益恆無盡 盡於未來一切劫 圓滿無上大菩提 於一切處同集會 一切行願同修學 爲我顯示普賢行 於我常生歡喜心 及諸佛子衆圍繞 盡未來劫無疲厭 光顯一切菩提行 盡未來劫常修習 所修福智恆無盡 獲諸無盡功德藏 ——糾有難思佛 我見恆演菩提行 ——毛端三世海 我徧修行經劫海 一言具衆音聲海

隨諸衆生意樂音 三世一切諸如來 恆轉理趣妙法輪 我能深入於未來 三世所有一切劫 我於一念見三世 亦常入佛境界中 於一毛端極微中 十方塵剎諸毛端 所有未來照世燈 究竟佛事示涅槃 速疾周徧神通力 智行普修功德力 **徧淨莊嚴勝福力** 定慧方便威神力 清淨一切善業力 降伏一切諸魔力 普能嚴淨諸刹海 善能分別諸法海 普能清淨諸行海 親近供養諸佛海 三世一切諸如來

-流佛辯才海 於彼無盡語言海 我深智力普能入 盡一切劫爲一念 爲一念際我皆入 所有一切人師子 如幻解脫及威力 出現三世莊嚴刹 我皆深入而嚴淨 成道轉法悟羣有 我皆往詣而親近 普門徧入大乘力 威神普覆大慈力 無著無依智慧力 普能積集菩提力 摧滅一切煩惱力 圓滿普賢諸行力 解脫一切衆生海 能甚深入智慧海 圓滿一切諸願海 修行無倦經劫海 最勝菩提諸行願 我皆供養圓滿修 一切如來有長子 我今迴向諸善根 願身口意恆清淨 如是智慧號普賢 我爲徧淨普賢行 滿彼事業盡無餘 我所修行無有量 安住無量諸行中 文殊師利勇猛智 我今迴向諸善根 三世諸佛所稱歎 我今迴向諸善根 願我臨欲命終時 面見彼佛阿彌陀 我旣往生彼國已 一切圓滿盡無餘 彼佛衆會咸清淨 親覩如來無量光 蒙彼如來授記已 智力廣大徧十方 乃至虚空世界盡

以普賢行悟菩提 彼名號曰普賢尊 願諸智行悉同彼 諸行糾土亦復然 願我與彼皆同等 文殊師利諸大願 未來際劫恆無倦 獲得無量諸功德 了達一切神通力 普賢慧行亦復然 隨彼一切常修學 如是最勝諸大願 爲得普賢殊勝行 盡除一切諸障礙 即得往生安樂刹 現前成就此大願 利樂一切衆生界 我時於勝蓮華生 現前授我菩提記 化身無數百俱胝 普利一切衆生界 衆生及業煩惱盡 如是一切無盡時 十方所有無邊刹 最勝安樂施天人 若人於此勝願王 求勝菩提心渴仰 卽常遠離惡知識 速見如來無量光 此人善得勝壽命 此人不久當成就 往昔由無智慧力 誦此普賢大願王 族姓種類及容色 諸魔外道不能摧 速詣菩提大樹王 成等正覺轉法輪 若人於此普賢願 果報唯佛能證知 若人誦此普賢願 一念一切悉皆圓 我此普賢殊勝行 普願沈溺諸衆生

我願究竟恆無盡 莊嚴衆寶供如來 經一切糾微塵劫 一經於耳能生信 獲勝功德過於彼 永離一切諸惡道 具此普賢最勝願 此人善來人中生 如彼普賢菩薩行 所造極惡五無閒 一念速疾皆消滅 相好智慧咸圓滿 堪爲三界所應供 坐已降服諸魔衆 普利一切諸含識 讀誦受持及演說 決定獲勝菩提道 我說少分之善根 成就衆生清淨願 無邊勝福皆迴向 速往無量光佛刹

爾時普賢菩薩摩訶薩. 於如來前. 說此普賢

廣大願王清淨偈已。善財童子. 踊躍無量. 一切 菩薩. 皆大歡喜。如來讚言. 善哉善哉。爾時世 尊. 與諸聖者菩薩摩訶薩. 演說如是不可思議解 脫境界勝法門時, 文殊師利菩薩而爲上首, 諸大 菩薩.及所成熟六千比丘。彌勒菩薩而爲上首.賢 劫一切諸大菩薩。無垢普賢菩薩而爲上首.一生 補處. 住灌頂位. 諸大菩薩。及餘十方種種世 界. 普來集會. 一切刹海極微塵數諸菩薩摩訶薩 衆。大智舍利弗.摩訶目犍連等.而爲上首.諸 大聲聞。幷諸人天一切世主. 天龍夜叉. 乾闥 婆. 阿修羅. 迦樓羅. 緊那羅. 摩睺羅伽. 人非 人等. 一切大衆. 聞佛所說. 皆大歡喜. 信受奉 行。

大方廣佛華嚴經普賢菩薩行願品

大方廣佛華嚴經淨行品

唐于闐國三藏沙門實叉難陀譯

爾時智首菩薩問文殊師利菩薩言. 佛子. 菩 薩云何得無過失身語意業. 云何得不害身語意 業. 云何得不可毀身語意業. 云何得不可壞身語 意業. 云何得不退轉身語意業. 云何得不可動身 語意業. 云何得殊勝身語意業. 云何得清淨身語 意業. 云何得無染身語意業. 云何得智爲先導身 語意業。云何得生處具足,種族具足,家具足,色 具足. 相具足. 念具足. 慧具足. 行具足. 無畏 具足,覺悟具足。云何得勝慧,第一慧,最上慧,最 勝慧.無量慧.無數慧.不思議慧.無與等慧.不 可量慧.不可說慧。云何得因力.欲力.方便力.緣 力,所緣力,根力,觀察力,奢摩他力,毗鉢舍 那力.思惟力。云何得蘊善巧.界善巧.處善巧.緣 起善巧, 欲界善巧, 色界善巧, 無色界善巧, 過 去善巧. 未來善巧. 現在善巧。云何善修習念覺 分. 擇法覺分. 精進覺分. 喜覺分. 猗覺分. 定 覺分. 捨覺分. 空. 無相. 無願。云何得圓滿檀 波羅蜜. 尸波羅蜜. 羼提波羅蜜. 毗黎耶波羅 蜜. 禪那波羅蜜. 般若波羅蜜. 及以圓滿慈. 悲. 喜. 捨。云何得處非處智力. 過未現在業報智力. 根勝劣智力. 種種界智力. 種種解智力. 一切至處道智力. 禪解脫三昧染淨智力. 宿住念智力. 無障礙天眼智力. 斷諸習智力。云何常得天王. 龍王. 夜叉王. 乾闥婆王. 阿修羅王. 迦樓羅王. 緊那羅王. 摩睺羅伽王. 人王. 梵王. 之所守護. 恭敬供養。云何得與一切衆生爲依. 爲救. 爲歸. 爲趣. 爲炬. 爲明. 爲照. 爲導. 爲粉. 爲歸. 爲世. 爲明. 爲知. 爲等. 爲 大. 爲勝. 爲最勝. 爲妙. 爲極妙. 爲上. 爲無失. 爲無等. 爲無等。

爾時文殊師利菩薩告智首菩薩言.善哉.佛子.汝今爲欲多所饒益.多所安隱.哀愍世間.利樂天人.問如是義。佛子.若諸菩薩善用其心.則獲一切勝妙功德.於諸佛法.心無所礙.住去來今諸佛之道.隨衆生住.恆不捨離.如諸法相.悉能通達.斷一切惡.具足衆善.當如普賢色像第一.一切行願.皆得具足.於一切法.無不自在.而爲衆生第二導師。佛子.云何用心.能獲一切勝妙功德。佛子.

菩薩在家 當願衆生 知家性空 免其逼迫

護養一切 當願衆生 孝事父母 善事於佛 當願衆生 怨親平等 永離貪著 妻子集會 若得五欲 當願衆生 拔除欲箭 究竟安隱 伎樂聚會 當願衆生 以法自娱 了伎非實 永除穢欲 若在宮室 當願衆生 入於聖地 當願衆生 到真實處 著瓔珞時 捨諸僞飾 當願衆生 上昇樓閣 昇正法樓 徹見一切 當願衆生 若有所施 一切能捨 心無愛著 衆會聚集 當願衆生 捨衆聚法 成一切智 若在戹難 當願衆生 隨意自在 所行無礙 捨居家時 當願衆生 出家無礙 心得解脫 入僧伽藍 當願衆生 演說種種 無乖諍法 當願衆生 詣大小師 習行善法 巧事師長 求請出家 當願衆生 得不退法 心無障礙 當願衆生 脫去俗服 勤修善根 捨諸罪軛 究竟寂滅 **髽除鬚髮** 當願衆生 永離煩惱 著袈裟衣 當願衆生 心無所染 具大仙道 正出家時 當願衆生 同佛出家 救護一切 當願衆生 自歸於佛 紹降佛種 發無上意 當願衆生 自歸於法 智慧如海 深入經藏 當願衆生 自歸於僧 統理大衆 一切無礙 善學於戒 受學戒時 當願衆生 不作衆惡

受闍黎教 當願衆生 所行真實 具足威儀 受和尚教 當願衆生 到無依處 入無生智 受具足戒 當願衆生 具諸方便 得最勝法 若入堂宇 當願衆生 昇無上堂 安住不動 當願衆生 開敷善法 見真實相 若敷牀座 當願衆生 正身端坐 坐菩提座 心無所著 當願衆生 結跏趺坐 善根堅固 得不動地 究竟無餘 修行於定 當願衆生 以定伏心 若修於觀 當願衆生 見如實理 永無乖諍 捨跏趺坐 當願衆生 觀諸行法 悉歸散滅 下足住時 當願衆生 心得解脫 安住不動 具衆善法 若舉於足 當願衆生 出生死海 當願衆生 服諸善根 具足慚愧 著下裙時 當願衆生 不今散失 整衣束帶 檢束善根 當願衆生 若著上衣 獲勝善根 至法彼岸 著僧伽黎 當願衆生 入第一位 得不動法 手執楊枝 當願衆生 皆得妙法 究竟清淨 嚼楊枝時 當願衆生 其心調淨 噬諸煩惱 當願衆生 大小便時 棄貪瞋癡 蠲除罪法 當願衆生 事訖就水 出世法中 速疾而往 當願衆生 畢竟無垢 洗滌形穢 清淨調柔 當願衆生 得清淨手 以水盥掌 受持佛法

當願衆生 永無垢染 以水洗面 得淨法門 當願衆生 示如實道 手執錫杖 設大施會 執持應器 當願衆生 成就法器 受天人供 發趾向道 當願衆生 趣佛所行 入無依處 當願衆生 能行佛道 向無餘法 若在於道 當願衆生 涉路而去 履淨法界 心無障礙 當願衆生 永出三界 見昇高路 心無怯弱 當願衆生 見趣下路 其心謙下 長佛善根 見斜曲路 當願衆生 捨不正道 永除惡見 若見直路 當願衆生 其心正直 無諂無誑 見路多塵 當願衆生 遠離塵坌 獲清淨法 見路無塵 當願衆生 常行大悲 其心潤澤 當願衆生 若見險道 住正法界 離諸罪難 若見衆會 當願衆生 說甚深法 一切和合 當願衆生 離我諍心 若見大柱 無有忿恨 若見叢林 當願衆生 諸天及人 所應敬禮 若見高山 當願衆生 善根超出 無能至頂 見.棘刺樹 當願衆生 疾得翦除 三毒之刺 當願衆生 見樹葉茂 以定解脫 而爲蔭映 當願衆生 如華開敷 若見華開 神诵等法 當願衆生 若見樹華 衆相如華 具三十二 若見果實 當願衆生 證菩提道 獲最勝法

若見大河 當願衆生 入佛智海 得預法流 若見陂澤 當願衆生 疾悟諸佛 一味之法 若見池沼 當願衆生 語業滿足 巧能演說 若見汲井 當願衆生 具足辯才 演一切法 若見涌泉 當願衆生 方便增長 善根無盡 當願衆生 若見橋道 猶如橋梁 廣度一切 當願衆生 若見流水 得善意欲 洗除惑垢 當願衆生 見修園圃 耘除愛草 五欲圃中 見無憂林 當願衆生 永離貪愛 不生憂怖 若見園苑 當願衆生 勤修諸行 趣佛菩提 見嚴飾人 當願衆生 三十二相 以爲嚴好 見無嚴飾 當願衆生 捨諸飾好 具頭陀行 當願衆生 以法自娱 歡愛不捨 見樂著人 當願衆生 見無樂著 有爲事中 心無所樂 見歡樂人 當願衆生 常得安樂 樂供養佛 見苦惱人 當願衆生 獲根本智 滅除衆苦 見無病人 當願衆生 入眞實慧 永無病惱 見疾病人 當願衆生 知身空寂 離乖諍法 見端正人 當願衆生 於佛菩薩 常生淨信 當願衆生 於不善事 見醜陑人 不生樂著 當願衆生 能知恩德 見報恩人 於佛菩薩 於有惡人 見背恩人 當願衆生 不加其報

若見沙門 當願衆生 畢竟第一 調柔寂靜 見婆羅門 當願衆生 永持梵行 離一切惡 見苦行人 當願衆生 依於苦行 至究竟處 見操行人 當願衆生 堅持志行 不捨佛道 常服善鎧 見著甲胄 當願衆生 趣無師法 當願衆生 見無鎧仗 永離一切 不善之業 見論議人 當願衆生 於諸異論 悉能摧伏 當願衆生 得清淨命 見正命人 不矯威儀 若見於王 當願衆生 得爲法王 恆轉正法 若見王子 當願衆生 從法化生 而爲佛子 若見長者 當願衆生 善能明斷 不行惡法 當願衆生 習行衆善 若見大臣 恆守正念 當願衆生 若見城郭 得堅固身 心無所屈 當願衆生 心恆喜樂 若見王都 功德共聚 見處林藪 當願衆生 之所歎仰 應爲天人 入里乞食 入深法界 當願衆生 心無障礙 到人門戶 當願衆生 入於一切 佛法之門 入其家已 當願衆生 得入佛乘 三世平等 見不捨人 當願衆生 常不捨離 勝功德法 見能捨人 當願衆生 永得捨離 三惡道苦 當願衆生 若見空鉢 其心清淨 空無煩惱 具足成滿 若見滿鉢 當願衆生 一切善法

當願衆生 若得恭敬 恭敬修行 一切佛法 不得恭敬 當願衆生 不行一切 不善之法 具慚恥行 見慚恥人 當願衆生 藏護諸根 見無慚恥 當願衆生 捨離無慚 **住大慈**道 滿足其願 若得美食 當願衆生 心無羨欲 當願衆生 莫不獲得 得不美食 諸三昧味 當願衆生 得柔輭食 大悲所熏 心意柔輭 得麤澀食 當願衆生 心無染著 絕世貪愛 禪悅爲食 若飯食時 當願衆生 法喜充滿 若受味時 當願衆生 得佛上味 甘露滿足 飯食已訖 當願衆生 所作皆辦 具諸佛法 得無盡辯 若說法時 當願衆生 廣宣法要 當願衆生 從舍出時 永出三界 深入佛智 當願衆生 若入水時 入一切智 知三世等 洗浴身體 當願衆生 身心無垢 內外光潔 盛暑炎毒 當願衆生 捨離衆惱 一切皆盡 暑退涼初 當願衆生 證無上法 究竟清涼 諷誦經時 當願衆生 順佛所說 總持不忘 若得見佛 當願衆生 得無礙眼 見.一切佛 當願衆生 諦觀佛時 皆如普賢 端正嚴好 當願衆生 見佛塔時 尊重如塔 受天人供 諸天及人 當願衆生 敬心觀塔 所共瞻仰

無能見頂 頂禮於塔 當願衆生 一切天人 右繞於塔 當願衆生 所行無逆 成一切智 當願衆生 繞塔三市 勤求佛道 心無懈歇 稱歎無盡 讚佛功德 當願衆生 衆德悉具 當願衆生 證無相法 讚佛相好 成就佛身 若洗足時 當願衆生 具神足力 所行無礙 以時寢息 當願衆生 身得安隱 心無動亂 睡眠始寤 當願衆生 一切智覺 周顧十方

佛子. 若諸菩薩如是用心. 則獲一切勝妙功德. 一切世間諸天. 魔. 梵. 沙門. 婆羅門. 乾闥婆. 阿修羅等. 及以一切聲聞. 緣覺. 所不能動。

大方廣佛華嚴經淨行品 (終)

淨土五經後附華嚴經淨行品緣起序。

華嚴妙典. 理事圓融. 理由事顯. 事因理 成. 理事各臻其極. 圓證毗盧法身。以故如來初 成正覺. 與十住. 十行. 十迴向. 十地. 等覺. 四 十一位法身大士. 說如來自證法門諸因果法。因 即事。如來自證之法, 即一眞法界, 寂照圓 不生不滅. 非有非空之真如佛性也。此之佛 性, 在凡不減, 在聖不增。佛以究竟證故, 常享 常樂我淨之法樂。衆生以徹底迷故, 恆受生死輪 迴之妄苦。譬如大圓寶鏡, 經劫蒙塵, 雖有照天 照地之光, 莫由發現而得受用。故借諸菩薩, 互 相酬唱. 爲說十信. 十住. 十行. 十迴向. 十地. 等 覺, 各法門。又復以十大願王, 導歸極樂, 以期 圓滿佛果。此如來以自證之因果. 普示一切衆 生. 令其各各親證之一大軌範也。其在信位. 則 以淨行品. 爲以因地心. 上契果覺之弘誓大願。 雖進而登十住.十行.十迴向.十地.等覺.各 深位. 猶復以此一百四十一願. 而爲進修之據。 是知此一品經.關係甚大.不徒爲入佛之初基.洵 可謂成佛之大本。而末世衆生. 根機淺薄. 果能

心心念念. 常誦此文. 常發此願. 便可三業頓獲 清淨. 念念上契佛心. 臨終直登上品. 與普賢行 願品功德,交光互映,無或差池。故宋初省常法 師. 慕廬山遠公之風. 提倡淨土法門. 刺血書此 品,又以淨行名其社。而蓮宗得以丕振者,以深 致力于日用云爲. 悉使與如來無上覺道合之所以 也。一弟子楊慧導. 擬以淨行品. 與普賢行願 品. 合印流通。光謂欲令初機息心念佛. 當以淨 土五經爲先導.不宜於五經中只取行願一品。使 彼徧讀五經.再以淨行一品.作一切時一切處之 警策. 則自可欣欣就道矣。嗚乎. 今之時. 是何 時也. 乃相與提倡實行獸化. 殺父殺母. 共妻共 產之時也。若不以信願念佛, 求生西方爲導, 則 後世爲人. 恐先聖所立綱常倫理之名. 亦不可得 而聞矣。以故凡具正知見,正信心者,咸皆以修 持淨業爲志事。茲特述其緣起. 以附於經文之 後. 庶後之讀者. 無所疑焉。

民國二十三年甲戌夏至日常慚愧僧釋印光 謹撰

大佛頂首楞嚴經卷第六 四種決定清淨明誨

佛告阿難.汝常聞我毗奈耶中.宣說修行三決定義。所謂攝心爲戒.因戒生定.因定發慧.是 則名爲三無漏學。

阿難,云何攝心我名爲戒。若諸世界六道眾 生. 其心不淫. 則不隨其生死相續。汝修三昧. 本 出塵勞。淫心不除. 塵不可出。縱有多智禪定現 前,如不斷淫,必落魔道。上品魔王,中品魔民,下 品魔女。彼等諸魔,亦有徒眾,各各自謂成無上 道。我滅度後, 末法之中, 多此魔民熾盛世閒。 廣行貪淫. 爲善知識. 令諸眾生. 落愛見坑. 失 菩提路。汝教世人修三摩地,先斷心淫,是名如 來先佛世尊. 第一決定清淨明誨。是故阿難. 若 不斷浮,修禪定者,如蒸沙石,欲其成飯,經百 千劫, 祇名熱沙。何以故, 此非飯本, 沙石成故。 汝以淫身, 求佛妙果, 縱得妙悟, 皆是淫根。根 本成浮,輪轉三塗,必不能出。如來涅槃,何路 修證。必使淫機.身心俱斷.斷性亦無.於佛菩 提,斯可希冀。如我此說,名爲佛說。不如此說,卽 波旬說。

阿難. 又諸世界六道眾生. 其心不殺. 則不 隨其生死相續。汝修三昧. 本出塵勞。殺心不 除. 塵不可出。縱有多智禪定現前. 如不斷殺. 必 落神道。上品之人, 爲大力鬼。中品則爲飛行夜 叉. 諸鬼帥等。下品當爲地行羅刹。彼諸鬼神. 亦 有徒眾. 各各自謂成無上道。我滅度後. 末法之 中. 多此鬼神熾盛世閒。自言食肉. 得菩提路。 阿難. 我令比丘食五淨肉. 此肉皆我神力化生. 本 無命根。汝婆羅門. 地多蒸溼. 加以沙石. 草菜 不生。我以大悲神力所加,因大慈悲,假名爲 肉. 汝得其味。奈何如來滅度之後. 食眾生肉. 名 爲釋子。汝等當知. 是食肉人. 縱得心開似三摩 地. 皆大羅刹. 報終必沈生死苦海. 非佛弟子。 如是之人, 相殺相吞, 相食未已, 云何是人得出 三界。汝教世人修三摩地.次斷殺生.是名如來 先佛世尊. 第二決定清淨明誨。是故阿難. 若不 斷殺. 修禪定者. 譬如有人. 自塞其耳. 高聲大 叫. 求人不聞. 此等名爲欲隱彌露。清淨比丘. 及 諸菩薩, 於歧路行, 不蹋生草, 況以手拔。云何 大悲. 取諸眾生血肉充食。若諸比丘. 不服東方 絲緜絹帛. 及是此土靴履裘毳. 乳酪醍醐。如是 比丘.於世眞脫.酬還宿債.不遊三界。何以故.服其身分.皆爲彼緣。如人食其地中百穀.足不離地。必使身心.於諸眾生.若身身分.身心二塗.不服不食.我說是人.眞解脫者。如我此說.名爲佛說。不如此說.卽波旬說。

阿難. 又復世界六道眾生. 其心不偷. 則不 隨其生死相續。汝修三昧. 本出塵勞。偷心不 除. 塵不可出。縱有多智禪定現前. 如不斷偷. 必 落邪道。上品精靈. 中品妖魅. 下品邪人. 諸魅 所著。彼等羣邪,亦有徒眾,各各自謂成無上道。 我滅度後, 末法之中, 多此妖邪熾盛世閒。潛匿 姦欺. 稱善知識. 各自謂己得上人法。該惑無 識.恐令失心。所過之處.其家耗散。我教比丘.循 方乞食. 令其捨貪. 成菩提道。諸比丘等. 不自 熟食. 寄於殘生. 旅泊三界. 示一往還. 去已無 返。云何賊人. 假我衣服. 裨販如來. 造種種業. 皆 言佛法。卻非出家具戒比丘. 爲小乘道。由是疑 誤無量眾生. 墮無閒獄。若我滅後. 其有比丘. 發 心決定修三摩地. 能於如來形像之前. 身然一 燈. 燒一指節. 及於身上爇一香炷. 我說是人. 無 始宿債.一時酬畢.長揖世閒.永脫諸漏。雖未 卽明無上覺路. 是人於法已決定心。若不爲此捨

身微因. 縱成無爲. 必還生人. 酬其宿債。如我馬麥. 正等無異。汝敎世人修三摩地. 後斷偷盜. 是名如來先佛世尊. 第三決定清淨明誨。是故阿難. 若不斷偷修禪定者. 譬如有人. 水灌漏卮. 欲求其滿. 縱經塵劫. 終無平復。若諸比丘. 衣鉢之餘. 分寸不畜。乞食餘分. 施餓眾生。於大集會. 合掌禮眾。有人捶詈. 同於稱讚。必使身心二俱捐捨. 身肉骨血. 與眾生共。不將如來不了義說. 迴爲己解. 以誤初學。佛印是人. 得眞三昧。如我所說. 名爲佛說。不如此說. 卽波旬說。

阿難.如是世界六道眾生.雖則身心無殺盜淫.三行已圓。若大妄語.卽三摩地.不得清淨。成愛見魔.失如來種。所謂未得謂得.未證言證。或求世閒尊勝第一。謂前人言.我今已得須陀洹果.斯陀含果.阿那含果.阿羅漢道.辟支佛乘.十地.地前.諸位菩薩.求彼禮懺.貪其供養。是一顚迦.銷滅佛種。如人以刀斷多羅木。佛記是人.永殞善根.無復知見.沈三苦海.不成三昧。我滅度後.勅諸菩薩.及阿羅漢.應身生彼末法之中.作種種形.度諸輪轉。或作沙門.白衣居士.人王宰官.童男童女。如是乃至淫女寡婦.姦

偷屠販. 與其同事. 稱讚佛乘. 令其身心入三摩 地。終不自言我眞菩薩. 眞阿羅漢. 洩佛密因. 輕 言未學。唯除命終. 陰有遺付。云何是人. 惑亂 眾生. 成大妄語。汝教世人修三摩地. 後復斷除 諸大妄語, 是名如來先佛世尊, 第四決定清淨明 誨。是故阿難. 若不斷其大妄語者. 如刻人糞. 爲 栴檀形. 欲求香氣. 無有是處。我敎比丘. 直心 道場. 於四威儀. 一切行中. 尚無虛假. 云何自 稱得上人法。譬如窮人. 妄號帝王. 自取誅滅。 況復法王. 如何妄竊。因地不眞. 果招紆曲。求 佛菩提,如噬臍人,欲誰成就。若諸比丘,心如 直弦. 一切眞實. 入三摩地. 永無魔事。我印是 人. 成就菩薩無上知覺。如我所說. 名爲佛說。 不如此說. 卽波旬說。

大佛頂首楞嚴經四種決定清淨明誨 (终)

戒定慧三學,爲學佛,及修淨業者之根本,而 戒尤爲要。故觀無量壽佛經. 開示淨業三福. 一 則孝養父母.奉事師長.慈心不殺.修十善業。 二則受持三歸. 具足眾戒. 不犯威儀。三則發菩 提心,深信因果,讀誦大乘,勸進行者。初二多 屬戒學.三則三學圓具。具此三福.則淨業大 成. 往生上品。故于淨土五經後. 附華嚴經淨行 品,及楞嚴經四種清淨明誨。以期淨業行者,于 律儀戒之執身不作. 進而得定共戒之制心不 起,及道共戒之超情離念,斷惑證眞。然縱得定 共道共二種實益.猶當兢兢業業.執持律儀戒.以 爲自利利他,維持法道之軌範。則空解脫人,無 由以大乘藉口,而因之以壞亂,佛法,疑悞眾生也。

民國二十五年.歲次丙子.仲春.釋印光敬跋。

● 結誦儀

拔一切業障根本得生淨土陀羅尼

(三遍)

南無阿彌多婆夜。哆他伽跢夜。哆地夜他。 阿彌唎。都婆毗。阿彌唎哆。悉耽婆毗。阿彌唎 哆。毗迦蘭帝。阿彌唎哆。毗迦蘭哆。伽彌膩。 伽伽那。枳多迦隸。娑婆訶。

(不思議神力傳云.若欲受持咒法.嚼楊枝.澡豆.漱口.然香.于佛像前胡跪合掌。日夜六時.各誦三七遍。即滅四重. 五逆.十惡。謗方等罪.悉得滅除。現世所求皆得。不為惡鬼神所惑亂。若數滿二十萬遍.即感得菩提牙生。若至三十萬遍.即面見阿彌陀佛。拔一切業障根本得生淨土神咒云.若有善男子善女人能誦此咒者.阿彌陀佛常住其頂日夜擁護.無令怨家而得其便.現世常得安隱.臨命終時.任運往生。)

讃佛偈

(一遍)

阿彌陀佛身金色 相好光明無等倫 白毫宛轉五須彌 紺目澄清四大海 光中化佛無數億 化菩薩眾亦無邊 四十八願度眾生 九品咸令登彼岸

南無西方極樂世界大慈大悲阿彌陀佛 -#

南無阿彌陀佛 千稱或数百稱

阿彌陀佛 千稱或数百稱

南無觀世音菩薩 三稱三拜

南無大勢至菩薩 三稱三拜

南無清淨大海眾菩薩 三稱三拜

西方發願文

(一遍)

稽首西方安樂國 接引眾生大導師 我今發願願徃生 惟願慈悲哀攝受

弟子某甲眾等 普為四恩三有.法界眾生.求於諸佛一乗無上菩提道故.專心持念阿彌陀佛.萬德洪名.期生淨土。又以業重福輕.障深慧淺.染心易熾.淨德難成。今於佛前.翹勤五體.披瀝一心.投誠懺悔。

我及眾生. 曠劫至今. 迷本淨心。縱貪瞋癡. 染穢三業. 無量無邊。所作罪垢. 無量無邊。所結冤業. 願悉消滅。從於今日. 立深誓願。遠離惡法. 誓不更造。勤修聖道. 誓不退惰。誓成正覺. 誓度眾生。阿彌陀佛. 以慈悲願力. 當證知我. 當哀憫我. 當加被我。願禪觀之中. 夢寐之際. 得見阿彌陀佛金色之身. 得歷阿彌陀佛寶嚴之土. 得蒙阿彌陀佛甘露灌頂. 光明照身. 手摩我頭. 衣覆我體。使我宿障自除. 善根增長。疾空煩惱. 頓破無明。圓覺妙心. 廓然開悟。寂光眞境. 常得現前。

至於臨欲命終.預知時至。身無一切病苦厄

難. 心無一切貪戀迷惑。諸根悅豫. 正念分明。 捨報安詳.如入禪定。阿彌陀佛.與觀音勢至.諸 聖賢眾. 放光接引. 垂手提攜。樓閣幢旙. 異香 天樂, 西方聖境, 昭示目前。令諸眾生, 見者聞 者. 歡喜感歎. 發菩提心。我於爾時. 乗金剛臺. 隨 從佛後。如彈指頃,生極樂國,七寶池内,勝蓮 華中。華開見佛.見諸菩薩.聞妙法音.獲無生 忍。於須臾間.承事諸佛.親蒙授記。得授記已.三 身四智. 五眼六通. 無量百千陀羅尼門. 一切功 德. 皆悉成就。然後不違安養. 廻入娑婆。分身 無數. 徧十方剎。以不可思議自在神力. 種種方 便. 度脫眾生. 咸令離染. 還得淨心. 同生西方. 入 不退地。

如是大願.世界無盡.眾生無盡.業及煩惱一切無盡.我願無盡。願今禮佛發願修持功德.廻施有情。四恩總報.三有齊資。法界眾生.同圓種智。

發願文

(一遍)

 真實功德佛名號 證知懺悔及所願 皆由無始貪瞋癡 一切我今皆懺悔 盡除一切諸障礙 即得往生安樂剤 一切皆悉盡迴向 同生西方極樂國

慈雲懺主淨土文

(一遍)

一心皈命.極樂世界.阿彌陀佛。願以淨光 照我.慈誓攝我。我今正念.稱如來名.爲菩提 道.求生淨土。佛昔本誓.若有眾生.欲生我國.至 心信樂.乃至十念.若不生者.不取正覺。以此 念佛因緣.得入如來大誓海中.承佛慈力.眾罪 銷滅.善根增長。若臨命終.自知時至.身無病 苦.心不貪戀.意不顛倒.如入禪定。佛及聖眾.手 執金臺來迎接我。於一念頃.生極樂國。華開見 佛.即聞佛乗.頓開佛慧。廣渡眾生.滿菩提願。

十方三世一切佛. 一切菩薩摩訶薩. 摩訶般若波羅蜜。

迴向偈

(一遍)

願生西方淨土中 九品蓮華為父母 華開見佛悟無生 不退菩薩為伴侶

迴向偈

(一遍)

願以此功德 莊嚴佛淨土 上報四重恩 下濟三途苦 若有見聞者 悉發菩提心 盡此一報身 同生極樂國

三皈依

(一遍)

自皈依佛.當願眾生.體解大道.發無上心。 自皈依法.當願眾生.深入經藏.智慧如海。自 皈依僧.當願眾生.統理大眾.一切無礙。和南 聖眾。

(上述三種發願文.及二種迴向偈.可各取一種發願迴向即 可。當對佛跪念.念畢.起身三禮而退。)

印送淨土五經跋

梵網經云. 我是已成佛. 汝是未成佛. 若能 如是信,戒品已具足。華嚴經云,一切衆生,具 有如來智慧德相,但因妄想執著,不能證得。若 離妄想,則一切智,自然智,無礙智,則得現前。 是知衆生心性 與佛原同 心佛衆生 三無差別. 祇爲迷悟之分耳。 奈衆生迷而不覺時. 雖具有豎 窮三際. 横徧十方. 廣大圓滿之佛性. 全被塵勞 埋没, 反承此佛性功德之力, 起惑造業, 毀謗三 寶. 自害害他。正如流泉潛隱地中. 全不覺知. 必須時節因緣爲之啓發. 方能逐漸開明。所以古 今來許多有力偉人, 幼時迷昧, 專以毀謗佛法爲 能事。及閱歷漸深. 遇境逢緣. 翻然覺悟. 從而 皈依三寶. 實力奉行者. 亦不可勝數。足徵佛法 廣大. 實卽一切衆生本具之心法也。江西吉安吳 南浦居士. 本宿根深厚. 自少經商滬濱. 心存慈 善, 奈全不知佛法, 反目信佛爲迷信。其室人張 氏. 雖具信心. 而又不識邪正. 從而相勸. 亦難 啓發。民國二十年,被匪綁至匪窟, 愁苦交迫, 尋思無計.遂憶及張氏勸信佛法之語.因而望佛 慈救. 冀出匪窠。詎知佛法不可思議. 佛慈如母 憶子. 感應道交. 捷如桴鼓。忽來巡捕. 爲救旁 人之票. 誤走地方. 卽將伊救出. 不費分文. 安 然脫險。乃知佛法有靈, 略啓信心, 遂往普陀等 處進香禮佛。二十二年,與室人張氏,偕一子, 乘汽車, 行至途中曲處, 忽一西人少女, 從旁橫 適與車撞.被車橫壓.仆跌車下。伊父子三 嚇得魂不附體, 汗流浹背, 意謂此女已成三 段。急念觀世音菩薩. 以期佛慈加被解救。及停 車下看 但見該西女 仰臥車下 恰在四輪當中. 隨車拖走數十步。一時巡捕市民雲集. 該女父亦 尋至。將女援起,祇見其滿臉通紅,了無傷痕。 旋經檢驗. 毫無損傷. 女卽隨父而去。居士經此 二險 大啓信心 二十三年 特來向光求授皈依. 遂爲取法名曰慧雲. 張氏法名曰慧賢. 繼而進受 五戒。從此信心眞切. 精進修持. 復在靈巖各處 廣作功德。又數男名下 連得數女孫 艱於男孫。 至二十四年. 適居士六十壽期. 長兒媳遂生一麟 兒。各親友羣相道賀. 居士因已長齋奉佛. 則自 己壽誕,及孫兒彌月,皆用素筵,毫不動葷,以 爲戒殺喫素倡。今復以千圓印淨土五經. 贈送結 緣、請光述其信佛因緣而爲之跋。普願未發信心

者. 見聞起信. 已發信心者. 因而增長。必期人人信佛. 同生西方. 同圓種智. 以慰諸佛普度衆生之本懷焉。

民國二十六年二月. 觀音大士聖誕日. 常慚愧僧釋印光謹跋。

南无护法韦驮尊天菩萨





此咒置經書中可滅誤跨之罪